



MOSELI  
LANI  
PAEDO  
LOGIA

ARGENT.

1528


























ec / M2 /
















# PAEDOLO

GIA PETRI MOSELLANI PRO  
*tegensis, in puerorum usum conscripta  
& aucta.*

DIALOGI XXXVII.

## DIALOGI

PVERILES CHRISTO  
*phori Hegendorphini XII.  
lepidi æque ac docti.*

ARGENTORATI.



PETRVS MOSELLANVS, IOAN:

ni Polyandro Lipsiæ apud diuum Thomam

Ludimagistro suo S.

**E**st tu quidem mi Ioannes iam annos multos re ipsa expertus, quanta cū difficultate, & quā sero, infirma puerorū ætas, ad latinitatis antiquæ imitationem perueniat. Nā cum post prima rei grāmaticæ rudimenta tenera ingenia statim ad latini sermonis usum adigantur, nec tamen ulla eis uia ad hāc rem demonstratur, fit, ut dum utcumq; quod iubetur, præstare conantur, nouam quandam loquēdi rationē, plane barbaram, & per uernaculi sermonis uestigia ingredientem, inter se sibi ipsi confingant. Quod uitium rudibus animis, & per hoc tenacioribus primum impressum, postea nulla arte deleri potest. Atq; hęc caussa mihi uidetur quod non Germani solum, sed et Itali, qui nobis hac parte feliciores uideri uolunt, sermone quotidiano in mundo adeo & parum proprio, utuntur. Videas enim bonam partē eorū, qui hodie linguam latinam profitentur, in loquendo nihil minus spirare, q̄natiuū illum, & incorruptum Romani sermonis odorē. Vt candidissimæ eloquentiæ scriptor Fabius, de extemporali orationis facultate frustra scripsisse uideatur. Quid? quod hoc malum grauioris etiam ætatis profectibus omnem aufert gratiam? Alioqui qua caussa male audiunt apud

A



Quintilianum, & item Gellium ὁ Ἰμαθεῖς, nisi quod  
à teneris, ut aiunt, unguiculis, optimis nō sunt adsueti.  
Obuia quæq; in authoribus citra delectum, in suū usum  
conuertunt, ut dictio eorū oīs, non propria et domi suæ  
nata, sed ē uarijs scriptoribus, hostiatim quasi mendicā  
do cōgesta, delicati iudicij hoībus nō possit non putere.  
Hæc quum tu non minus acute q̄ grauitèr perpenderes  
nihilq; haberes potius, quàm puerorum, q̄ tuæ fidei sūt  
concrediti, rudem & ad omnia sequacem animum ad o  
ptima quæq; perducere, me cū egisti sæpe, ut loquendi  
formulas aliquot, quibus ea ætas uti posset, conscribere  
rem. Diu, ut nosti, sum reluctatus, partim quòd ipse gra  
uioribus occupatus, hanc operā utilissimam q̄dem illā.  
sed in speciem tamen humilem, & penè sordidam dedig  
narer, partim quòd, quia in ludis eiusmodi ipse non ad  
modū essem uersatus, uix possem eam quasi personā cū  
decoro gerere. Videbam enim ad hanc fabulam agen  
dā opus fore denuo repuerascere, & ut ait Flac. Lude  
re par impar, equitare in arundine longa. Sed, cū tu ro  
gandi finem faceres nullum, pariterq; te, qui probe pu  
erorū sensum calleres, si qua nobis hac parte deessent.  
suppleturū promitteres, uolui quāuis calumniam subi  
re potius, q̄ uel tibi amico tū synceriter amanti, tū prus  
denter roganti, quicquā negare, uel meo pudore pub  
licū pueritiæ commodum diutius remorari. Iam si q̄s  
est, qui uehementer putet indignum, has, sicuti prima  
frō

fronte uidentur, nugæ, in chartarum pernitiem scribi,  
is mihi uirum paulisper exuat, & in puerum redeat,  
cogitetq; iam primum sibi latini sermonis usum discen-  
dum. Statim opinor uidebit, quàm facile, & nullo penè  
negocio per eiusmodi fabulas, uelut quosdam gradus,  
ad Terentij proprietatem, ac Ciceromanam facilitatē  
prima illa ætas traduci potuisset. Quis aut laturus es-  
set, imò quis non statim exhibiturus, si ex puerili per-  
sona tetricam istam senum sapientiam sonarem? Tamet  
si sunt his nugamentis nostris admista quædam, quæ se-  
ria ducere uideri possint, vsq; adeo, ut & hoc nomine  
ab Aristarchis istis uix tutus sim futurus. Sed malui e-  
go decori paulisper oblitus, paucula subinde asper-  
gere, quæ si pueris suis literatores prælegant attente,  
queant cum studiorum abusum tollere, tū pueritiæ mo-  
res ad Christianam regulam corrigere. Hos labores ti-  
bi mi Polyander, dicare uolui nominatim, ut qui autor  
nobis et adiutor ad hæc scribenda fuisti, idem quoq; su-  
scipias, quicquid id est libelli, tua facundia, authorita-  
te ac gratia tuendum. Quod si ex hac editione ad te im-  
pulsorem, et me scriptorem, aut nulla, aut tenuis admo-  
dum gloria redibit, solemur nos ipsi per hoc, quòd nul-  
lo popularis auræ pruritu, sed pio & simplici animo, u-  
terq; nostrum hoc negotium tractauimus, tu adhortan-  
do ego scribendo. Si quidem iuuare studuimus saltem a-  
liquos, nocere nemini. Bene uale. Lipsiæ, ipsis ferijs di-  
ui Matthæi apostoli. Anno M. D. XVII.



DIALOGVS PRIMVS.  
GASPAR ET MODESTVS,  
de nundinis fabulantur. GAS.



Ge uero Modeste, quot dies hinc ab  
sunt nundinarum feriæ, quibus fre  
quentes adeo huc peregrini adueni  
unt mercatores? MOD. Dies, ni  
fallor, quattuordecim, nam accu  
rate singulas ferè horas ad calcus  
lum uoco, siquidem, nullum tempus totius anni cupidius  
expecto, quàm nundinarum. GAS. Non iniuria, quã  
do quidem hæ feriæ partim nūcios, partim literas, par  
tī omnibus literis gratiores pecunias, nobis adportāt.  
Quod si non & mihi iam plane exhausto, proximæ nū  
dinæ argenti subsidium attulerint, non potero hic dius  
tius durare. MO. Pecunias quidem, id quod satis scio  
accipiam nullas, pannum tamen in uestem hybernā, se  
discedenti mihi missurum promisit pater. GAS. Vtinā  
uterq; uoti compos fiat, ut & tu commodius uestitus, et  
ego numatior, urgētis hyemīs iniurias minori negotio  
propulsare queamus.

DIALOGVS II.  
OSVVALDVS ET MICHAEL.  
De natali celebrando, de receptis  
pecunijs, deq; bono cuiusq; ge  
nio.

## MOSELLANI.

**N**on tu hodie tuum natalem celebras, atq; nos tuos sodales conuiuio excipis? An ignoras hunc diem diuo Michaëli, cuius tu nomen refers esse sacrum? **MICH.** Scio e quidem, quid autem facerem, quando ne obulum quidem habeo quo panem emere queam, nedum conuiuia agitare? **OSVAL.** Non his nundinis à parētib; tibi numi sunt missi? **MI.** Sunt utiq; sed ante nundinarum exitum è mercatore, qui literas modo dedit, extorquere possum nihil, ait enim sibi in tanto hominum strepitu, otium ad numerandas pecunias non esse, alios qui, non modo natalem meum conuiuio exciperem, sed & genio bono (quem angelum dicimus) peculiari aliqua hilaritate gratificarer. **OSVAL.** Itaq; Terentia no illo satis excusati sumus. Vt quimus, aiunt, quando, ut uolumus non licet.

## DIALOGVS III.

**PETRVS ET PAVLVS. DE REDITU IN PATRIAM, DE LITERIS À PARENTIB; ACCEPTIS, DEQ; MISSIONE FLAGITANDA.**

**S**alue mi Paule. **PAV.** Et tu sodalium iucundissime Petre, Sed quid adeo es tristis? nam ex quo communia studia, idemq; hic ludus, mutua nos familiaritate iunxerunt, nultu alacri, et festiuo mihi semper es uisus.



## MOSELLANI.

Vt ex his, quos hic habet ludus, fuerit nemo, qui non te  
 familiariter uti concupiuerit, nunc nescio quomodo, a-  
 lius uideris. P E. Et mirū tibi uidetur, si uultu sum tri-  
 sti, cū eiusmodi quiddā mihi accidat, quod studiorū me-  
 orum progressum non parum queat remorari. PAV.  
 Quid illud quæso? Nā graue aliquid sit oportet, quod  
 te adolescentem constantem à studijs deducat. P E. Dis-  
 cam paucis. Iam annus fermè est, ex quo Ludi huius no-  
 stri celebritate excitus, huc, ad capiendum ingenij cul-  
 tum, concessi. quo tempore, studiorum meorum uix ra-  
 tionem inueni, cum mihi è patria offerūtur literæ, quæ  
 me domum, quasi ex medio studiorum cursu reuocant.  
 Et quod me omniū maxime male habet, reditus mei cau-  
 sas non edūt, Nec scire possum, an hūc tandem liceat re-  
 migrare. PAV. Qui scis, an ad fortunam aliquam auo-  
 ceris? P E. Nulla mihi fortuna potest incidere tanta, cu-  
 ius respectu literas queam posthabere. PAV. At paren-  
 tibus est obsequēdū. P E. Hoc illud est quod me mouet,  
 quod me hinc domum extrudit, Alioqui, tametsi nō tan-  
 tum est æris, quo hanc hyemem transmittere queam, ta-  
 men præ studiorum amore uictum mendicando hostia-  
 tim quæritassem. PAV. Non antequām hinc abeas, nun-  
 quām forsā rediturus, conuiuium inter nos agitabis-  
 mus? P E. Conuiuia agitare, qui ad supellectilis meæ  
 sarcinam componendam uix tempus habeo? Imò, iā res-  
 ta ad Ludimagistrum pergo, missionē efflagitaturus.  
quam

## DIALOGI.

quam ubi fuero consecutus, conterraneorum meorū literis, quas ad parentes suos mihi dabunt, acceptis, statim iter ingrediar. Quare rectissime uale mi Paule, mutuae nostrae consuetudinis memor. Quod si quando dabitur otium, fac de studiorum tuorum ratione, & ludi huius statu me literis tuis certiore reddas. PAV. Faciam scdulo mi Petre, & lubens quidem. Sed heust tu. PE. Quid est? PAV. Conterraneos tuos quorum consuetudo dum hic erant, utriq; nostrum erat grata, meo nomine diligenter salutes uelim. PE. Sat est, faciam.

## DIALOGVS IIII.

De conueniendo praeceptore, missione impetranda,  
deq; gratijs praeceptori agendis.

### PANDVLVS ET PETRVS.

PAN.

Vis es, qui trepide adeo pulsas hostium? En Petre tun? pulsasti. PE. pulsauit. PAN. Sed qua gratia huc intromitti postulas, non ut magistrum conuenias? PE. Maxime, si est intus, habeo quod cum eo agam ipse. PAN. Est intus, Sed mane paulisper, dū hūc tibi renuntio, an hoc temporis articulo, ei te audire uacet. Hec, Scholasticus quispiam foris expectat, qui, si non sit molestum, cupit te de re quapiam conuenire. LV



## MOSELLANI

DI. Quin huc adest. P A N. Iam iam aderit. P E. Salve  
 præceptor optime. Auocor hinc in patriam serijs parē  
 tum meorum literis, & si non auocarer, ipsa tamen æ  
 ris egestas, & item nuditas, domum abigere me posset.  
 Itaq; gratias ago tibi immortales obseruantissime præ  
 ceptor, quod me primum in tuam disciplinam humani  
 recipere dignatus es, deinde, ex quo tuæ scholæ fui se  
 ctator, & fideliter, & accurate tam literis bonis, quā  
 rectis moribus expolire studuisti. Porro quia, ut dixi,  
 non amplius hic morari licet, quā possum amanter o  
 ro, ut qua humanitate me hætenus tractasti, eadem &  
 migrandi potestatem concedas. Etenim si modo id pace  
 fiet tua, cras prima luce iter sumus ingressuri. L V DI.  
 Si quid feci quod gratum sit adolescens studiose, hoc to  
 tum non mihi, sed præceptoris officio feres acceptum,  
 Cæterum, quando te hinc parentum literis auocari di  
 cis, abi me permittente bonis auib; quocumq; te uel pa  
 rentes uocant, uel rectius forsan consilium hortatur.  
 P E. Sed illac qua iter sum facturus, amicos ne aliquos  
 habes, quos literis salutare cupias? quandoquidem ipse  
 perferendi onus in me lubēs recipio. L V D. Non admo  
 dum, & ut maxime haberem, tot tamen alijs negotijs in  
 præsentia districto, scribere non uacaret. Quare tu,  
 quod ad literas attinet securus, iter destinatum, quan  
 do lubet, capeffe. P E. Bene uale.

Dialos

DIALOGI.

DIALOGVS V.

De excipiendis scholasticis aliunde aduenientibus,  
deq; Græcæ literaturæ rudimentis in pri  
ma ætate addiscendis.

MARCVS ET IOANNES.

**V**Nde nobis aduenis mi Ioānes? aut quo aīo huc ad  
nos es profectus? Neq; enim opinor ludi huius  
gratia uenis, qui ante tot meis, atq; item aliorum lites  
ris inuitatus, huc pertrahi nō potuisti. IOAN. Imo hac  
ipsa caussa adsum. MAR. Vtcunq; sit, gaude te festiuis  
simum sodalem nobis redditum. Et hic aduentus tuus,  
non mihi solum, sed omnibus qui te norunt optatus est.  
Sed enim aperias oro, quidnam sit illud, quod te tandē  
huc allexerit. IO. Vis scire? MAR. Volo. IO. Audies,  
Quum primum puber factus, grauiori paulo cura præ  
ceptorem scriptores Latinos prælegentem audire ce  
pisssem, subinde Græculæ aliquot uoces nobis occurre  
bant, Quo loco, præceptor suo munere egregie se puta  
bat perfungi, quoties obiter tantum admoneret, esse  
græca, perinde ac si peregrina, ad nos nihil attinerēt.  
Hic quid alijs audientibus in mentem uenerit, nescio,  
equidem sic cogitabam, si ad nos hæc non pertinent, ut  
nec cognita doctum, nec incognita imperitum red

## MOSELLANI

dant, cur non ex libris, tanquàm offendicula quædam penitus eradimus? Deinde mirabar ueterum scriptorū penè omnium curiositatem, qui non solum magna cura peregrinas istas nugas didicissent, sed et libris suis, uelut maculas quasdam inspersissent. Postremo, quāquā à præceptore libere dissentire erat religio, tamen cum audirem esse uiros graues multos, qui has, sicuti tū putabatur, nugas amplecterentur, profiterenturq; paulatim circumspicere cepi, utrū credere mallet, magistrū ne meum potius ignorantia labi, an totam semel antiquitatem, et ex recentioribus optimos quosq; pueriliter quidem delirare. Itaq; sic mihi inter hæc fluctuanti, et in quam partem inclinarem hæsitāti, forte fortuna cecidit, ut Mar. Tul. Ciceronis libros de Off. enarrandos præceptor susciperet, in cuius lectionis ingressu statim in ipsa præfatione grauißimus ille, et philosophus, et orator, unico suo filio suadet, ut Græca cum latinis cōiungat, quo par sit in utriusq; orationis facultate. Hoc ubi, præceptore dissimulante, mihi arripuissem, grauius ter dolere cœpi, negatam nobis occasionem eas literas discendi, quarum studium, si essent iutiles, nec laudaret Co. Ro. nec filio unico iniungeret prudētissimus pater. MAR. Iam uideo quo tendas. IO. Mane, nondum omnia habes. Cum hæc subiratus mecum agitare, ecce rumor apud nos increbrescit, in hanc laudatissimam Aca-  
demiam Principis munificencia accersitos, qui publice  
græ



## DIALOGI.

græcas literas doceant, & ex eorum uelut fontibus nō  
nihil quoq; in ludum literariū deriuari. Hæc fama par  
tim literis, partim com meatibus confirmata illinc me  
utriusq; eruditionis cupidū exciuit, & huc appulit. Ha  
bes cur aduenerim, nimirū ut in hoc uestro ludo et græ  
ce linguæ elementa saltem liceat percipere. MAR. Du  
bio procul uoti cōpos eris, neq; aliquo aliō felicius te  
conferre potuisses, adeo hic omnia nobis sunt commo  
da. Deniq; quod peculiariter ad rem pertinet, ludus, si  
quisquā alibi, instructissimus. IO. Sed quando satis fa  
bulati sumus, hāc operam non negabis, opinor, ut me ad  
Ludi moderatorem deducas, siquidem iam statim nos  
men in hanc literariam militiam dare sum paratus.  
MAR. Faciam ac lubens, tu me sequere.

## DIALOGVS VI.

De recipiendis in disciplinam scholasticis.

MARCVS, LVDI MAGISTER,

& Ioannes.

**E**Ntibi præceptor optime, adduco hic quēdam, cū  
quo iam annos aliquot mihi fuit familiaritas, ho  
minem bonū & studiosum. Is tui ludi fama excitus hūc  
appulit. Quare magnæ felicitatis loco ducet, si se in tue

## MOSELLANI

orum gregem recipere dignatus fueris. LVD. Adole-  
scens bone, quod tibi est nomen? IO. Est mihi nomen Io-  
annes. LVD. Faustum planè nomen es sortitus, quippe  
hoc Hæbræis à gratia dicitur. Quamobrem summa os-  
pe tibi est enitendum, ut tam gratiosi nominis expectati-  
oni, pro tua uirili, respondeas. IO. Equidem pro uiris  
bus sedulo dabo operam, teq; in hoc mihi adiutorem fo-  
re spero. LVDI. Sed & ipsa corporis tui facies animū  
subesse ostendit, qui neq; à literis, neq; uirtutibus ab-  
horreat, adeo, ut si fortiter egeris, & de te dici demū  
possit illud, Grator est pulchro ueniens è corpore uir-  
tus. Quo libentius te in meam disciplinam recipio, si mo-  
do das fidem te boni discipuli officio apud me functu-  
rum. IO. Do fidem me in omnibus quod rectū erit, quod  
q; tu iusseris facturum. LVDI. Ita spero quidem. Sed q̄  
tibi est patria? ut in rationarium hoc quoq; adscribam.  
IO. Patria mihi est Auba, oppidum Franciæ orienta-  
lis, non procul ab Herbipoli, celebri sacerdotum sede,  
situm. LVD. Sat habeo, quod superest, curabitur tibi  
pro tua sorte commoditateq; domicilium. Ac tu quidē  
in eo sic te gere, ne aliqua macula hīc in nostram scho-  
lam redundet. IO. Quod ad hanc rem attinet, securus  
sto optime præceptor, nam, ut inquilinum decet, mode-  
stissime agam. Nunquid aliud mihi uis iniungere? LVD  
Nihil, nam si quid superest tibi præstandum, quotidie  
inter prælegendum à nobis dicetur.

DIA

DIALOGI.  
DIALOGVS VII.

De domicilio commodo, atq; incommodo, deq; paupertate, ac opulentia scholasticorum.

IOSEPHVS ET CLEANTHES.

Vid agitur mi Cleanthes? Contigit ne tibi com-  
Q moda habitandi ratio? aut adhuc incertis sedibus  
oberras? C L E. Contigit quidem habitaculum,  
sed eius commoditas tanta non est, quantam fore spera-  
ui, si quidem spes erat fore, ut ciuis alicuius beneficio u-  
na cum domicilio & uictum qualemcumq; nancisce-  
rer, uerum multo aliter euenit. Nam uix impetrare po-  
tui, ut pro Locario statuto mihi angulus in ludo loca-  
retur, uictum uero, quando pecuniæ est parum, hostia  
tim emedicari oportebit, nisi forte melior mihi fortu-  
na posthac obuenerit. Tu autē felix es mi Iosephe, cui  
parenteis tantum sumptū suppeditare sufficiūt, quātū  
ad studiorū commoditatē est satis. I O S E. Est, dijs gra-  
tia, unde hæc cōmoda mihi parē, sed quo plura mihi sūt  
ad disciplinas parādas commoda, eo ipso grauiori dig-  
nus essem odio, si nō plus q̄ uestrū quispiam didicero. At  
tamē nec uos de mediocri studiorū uestrorū profectu  
desperare decet, quādoqdem cōstat, multos humilina-  
tos loco, adhæc nullis ōnino fortūæ dotibus adiutos ad



## MOSELLANI

eruditionis fastigium ascendisse. An non Democritus ille physicus ex baiulo factus est philosophus? Non Cleanthes, cuius tu nomen refers, a quis noctu hauriendis diarrurnum uictum sibi quæsiuit? Et quem Stoicum hic nõ quaui? Sed Et Plautus inter ipsos pistrinæ molestos labores laudatissimas illas comœdias conscripsit.

CLE. His Et eiusmodi alijs exēplis animatus in studijs perseuero, alioqui me iam pridem ad manuariū aliquod artificium transtulissē. Quamquā sunt mei ordinis pleriq; adulescentes in ludis magis putrescentes, quā studentes, adeo infœlici ingenio, ut ad nullas literas sint apppositi, hi mihi nulli alij usui esse uidentur in ciuitatibus, quā quod alios mendicos, dū eis panē præripiunt, ex urbibus pellunt, ijs ego consulerem, ut se ad aliquod aliud studium applicarent. IOSE. Probe dicis mi Cleanthes, nam si omneis eiusmodi essent ingenio præditi, quali tu, fouendos modis omnibus putarem. Certe quod ad te attinet, spero propediem tibi meliorem fore conditionem, nempe ut apud ciuem quēpiam, cui non nunquā in seruias, omnem studiorum commoditatem sis habiturus. CLE. Vtinam Deus ita faxit, ne dubita, Et in hoc, mea commendatione iuuabere.

## DIALOGVS VIII.

ANDREAS, AC PHILIPPVS.

## DIALOGI.

De uindemia, & aucupio loquuntur.

**V**tinam mi Philippe iam domi apud parentes ageremus. PHI. Quid ita? AN. Rogas? imminet iam uindemiae tempus, quo nullum toto anno nostratibus accidit lætius. PHI. Quid ego audio? tunc simul uinito rem uis agere, & literarum cultorem? AN. Animi causa racemos decerperemus, degustaremus è lacu mustū, neq; enim diutius abesse optarem, quàm mustum in doslia conditum deferbuiisset, despumassetq; ad hæc decosqueremus sapham, defrutum, ac uini ueteris fecē. Quid? quòd nobis liceret & aucupio uoluptatem querere, si quidem uolucres captaremus iam retibus explicatis, iā pedicis fixis, nonnunquàm uero & uiminibus uisco illitis. PHI. Sine parentes harum rerum curam gerāt, tu si sapis, in literis te oblecta. AN. Atqui audiui magnos uiros in eiusmodi rusticis rebus oblectationē quæsiuisse. PHI. Recte, quando magnis uiris hæc sunt permittenda, nobis uero, qui nondum ultra primas literas progressi sumus, non itidem. AN. Semper tu quidem meis affectibus obstrepis, non minus quàm præceptor. PHI. Quod ad me attinet, age, age, ut lubet, me certe non habebis huius tuæ stultitiæ comitem.

DIALOGVS IX.

B

MOSELLANI  
THOMAS ET HIERONYMVS.

De authoribus proximo semestri in schola  
prælegendis.

Vid est quod illac uenis Hieronyme, aut ubi fuisti? HIE. Redeo a præceptore eo, qui a ludimagistro primas tenet. THO. Age, quid is narrat de authoribus hoc semestri prælegendis, iam enim sicut opinor, eorum delectum habuerunt. HIE. Habuerunt, idque si cuti dici audio, prudenter, nam præter utriusque lingue rudimenta, ex Fabij præscripto coniunctim tradenda, primum Terentianas comœdias exponendas suscep- runt, quod hic scriptor ex Latinis pene solus Romani sermonis natiuam, et genuinam proprietatem retineat, adeo ut nec Marcum Tullium, oratorum principem pudue- rit ad huius exemplum orationes suas formare, deinde Mar. Tul. officia, quod is liber non linguam solum elo- quetia expoliat, sed et pectus rectis moribus instruat, unde et Plinij iudicio non legendus, sed ad uerbum sit et discendus. Postremo aliquot Vergiliani poematis libri exponuntur, nempe ut Augustini iudicio, optimus poë- ta teneris animis infixus, in omnem usque uitam hæreat. Ad hæc, quando parum est æquum. Christianos in gentili- um libris esse totos, eis diebus, quibus ferias agimus, et legatissimos simul, et grauissimos hymnos Aurelij Pru- den



## DIALOGI.

dentij, grauis, & sancti uiri audiemus, aut si displiceāt,  
 Enchiridion militis Christiani, ab Erasmo Roterodamo  
 accuratissime elaboratum. Quæ si (ut spero) et pro  
 suo officio explicarint accurate præceptores, et nos  
 pari diligentia exceperimus, non opinor male hoc se-  
 mestre nobis fore collocatum. THO. Non iniuria hunc  
 laudant delectum mi Hieronyme, neq; enim unquam eo-  
 rum mihi placuit institutum, qui his, & id genus alijs  
 optimis scriptoribus posthabitis, in Apuleio, Cappella,  
 & eius farine authoribus cæteris, bonas horas male  
 collocant, qui scriptores Ciceroniana eloquentia non  
 contenti, sibi solis nouam dicendi rationem inuenerūt,  
 quasi non summum sit orationis uitium, à communi di-  
 cendi consuetudine abhorre- re. Nam qui citra dele-  
 ctum Catullos, Tibullos, Martiales, et huiusmodi enar-  
 rant, & per hoc discipulos peregrina et prodigiosa do-  
 cent uitia, hi mihi non uerbis, sed uerberibus coërcendi  
 uidetur. Hi enim sunt illi poëtæ, quos solos è republica  
 sua pellēdos statuit Plato. Atq; hæc non ex me dico, sed  
 quod sic cēsentes audiuerim doctis pariter, et integer  
 rimos uiros. HIER. Recte ergo facit ludi noster magis-  
 ter, qui eiusmodi nihil in scholam suam irreperere sinit.  
 Sed ego iam rectè, hinc in bibliopolium concedā, libros  
 de quibus dixi coëmp- turus. THO. Nostin' quanti hæc  
 simul emi possint? HIE. Haud dū licitatus sum, opinor  
 aureo numo, si quidē audio indicari argēteis uiginti quat-

MOSELLANI.

tuor. THO. Bene habet, quod non pluris uenduntur, de-  
loqui, quæ mea est ægestas, coëmere non suffecissem.  
HIE. Eamus ergo. THO. Quando uis, in me nō est  
mora.

DIALOGVS X.

De relegenda prælectione, de ediscendo, deq; eno-  
tandis ex authoribus loquendi formulis.

PHEDRVS, & ætate, & eruditione maior, cum  
fratre suo IOANNE loquitur.

Vid tu otiosus hic desides, & non potius prælecti  
Q onem modo auditam, relegis? IO. Relegi atq; ade-  
o bis, terue. PHE. At fortasse non satis accus-  
rate. IO. Acuratissime, ut totam etiam memoria com-  
plectar. PHE. An tuo te officio satis perfunctū cre-  
dis, si memoria tātum teneas, & Psitaci more uerba nō  
intellecta præceptorī reddas? IO. Quin intelligo om-  
nia. PHE. Hui omnia? uide quid dicas. IO. Omnia in-  
quam, ut maxime tibi uideatur incredibile, atq; id ut  
credas facilius, liberum tibi est, singula quæ ad modo  
auditam prælectionem attinent, ex me perquirere.  
PHE. Singula persequi in præsentia nō est otium, hoc  
tantum quero, Primum, An totam autoris sententiam,  
ex

## DIALOGI.

ex præceptoris interpretatione sis affectus, & quæ  
quidq; ratione, quoue consilio sit dictum intelligas. De  
inde singulas ne clausulas expenderis. Videlicet si quæ  
habeant sententiam insignem, si quod prouerbiū, si quod  
σχημα, si quem tropum, si quem colorem Rhetoricum  
si quem locum dialecticum, si quas uenuste loquēdi for  
mulas, quæ omnia enotare operæ precium est, partim ut  
sit in promptu semper, quo mores nostros pariter & a  
lienos corrigamus, partim ut ex idoneis scriptoribus sup  
petant recte loquendi scribēdiq; exempla, ad quæ cras  
sissima illa hodie barbarisantium loquendi consuetudinē  
posthabita, orationem nostram componere queamus.  
Postremo si quod dictum antique, si quod noue, quod lo  
quendo, si quod parum Christiane, quod uiuendo expri  
mere non conueniat. Hæc magister tuus, uir non solum  
doctus, sed & prudens inter prælegendum diligēter ad  
monere solet, et ipse eiusmodi, cum id ætatis erā, in scho  
lis non oscitāter excepta domum regressus, partim me  
moriam, partim chartis fidis memoriæ custodibus com  
mendabam. Sensi namq; hæc diligentia me uehementer  
proficere. Quod si fratris uestigijs insisteres, idemq; fa  
ceres, iam certe non hic, sed libris ad sideres. IO. Ni  
mis multa in puero requiris. Equidem ut quod uerū est,  
tibi respondeam, in his quæ tu mones exponenda, plari  
q; omneis sumus negligentiores. Nimirum contenti sin  
gularum dictionū, quæ in contextu reperiuntur respec



## MOSELLANI.

Etum habuisse, uidelicet quàm ex octo orationis partibus habeant pro genere, quæ sint accidētia, cuius generis, simplicia sint an composita, in quam cadant declinationem, Item quæ partiū sit inter sese cōstructio. PHE. Recte, sed & illa non oportet negligere. Alioqui nō uideo, quid referat Terētium, Ciceronem, Vergilium, et similes tanta cura sine fine tractari, si non inde aliquid quod uel ad recte uiuendi rationem, uel dicendi facultatem faciat, consequamur, Ipse certe eam lectionē, ex qua auditorum imitationi nihil accedit, nullam puto. Tantum abest ut istos probem qui scriptorum sensu exposuisse utcumq; contenti, nullam imitandi uiam discipulis commonstrant. Tu uero quando præceptorē natus es doctum & fidū, fac eius tum doctrine, tum fidei, diligentia tua respondeas. IO. Dabo operam sedulo, ne quod ad hanc rem attinet, iure me posthac obiurgare queas. Sed iam xij. horæ signum auditur, quare hinc ocyus in ludum contendam.

## DIALOGVS XI.

Complectens formulas loquendi de ferijs.

STEPHANVS ET  
Laurentius.

Quem

## DIALOGI.

Veni aiunt hodie apud populum in templo nostro  
**Q**uoniam concionaturum mi Laurenti? **LAV.** Audio quem  
piam è monachis in suggestum proditurum. **STE**  
Miror non insignem aliquem theologum ei negotio ad  
hiberi, maxime, cum ingens hominũ turba hodie in hãc  
ædem confluat, propterea quòd sacrificus quidam nus  
per in sacerdotum ordinem assumptus, primũ sacra fa  
ciet. **LAV.** Et mihi mirum uidetur, quamquã quod ad  
me attinet, uellem contio quã breuißima haberetur. Es  
tenim iam nunc uehementer esurio, biduano iam penè ie  
iunio maceratus. Nam his diebus quibus à carnibus ab  
stinetur, nũquã ab eo recte satur. **STE.** Duas adhuc ho  
ras edendi auiditas tibi est reprimenda, si quidem præ  
ter contionem, quæ horam poscit, scis quantum tempos  
ris in summo sacrificio Choraula sibi sumat, quem etiã  
penè superant hæ nostræ cantiones supra modum pro  
lixæ. **LAV.** Male sit istis, qui harum rerum nobis sunt  
autores. Ipse certe statim, ubi peractum fuerit sacrum,  
ad diuitum ostia citato adeo cursu contendam, ut si non  
in primis, secundis saltem, & tertijs stipem accipiam.  
**STE.** Sed me uix anteuertes. **LAV.** Res ipsa indicabit.

## DIALOGVS XII.

CLEMENS ET  
REMIGIVS

## MOSELLANI

De die à ferijs secundo, quem Martis uocant,  
confabulantur.

**V**Ae nobis mi Remigi, ultra præscriptum dormi-  
uimus. Iam enim Sol undiq; plena luce resplens  
det, ut septimæ horæ signum datū liceat conijcere. RE.  
Non opinor, cælum alioqui præter morem est serenū,  
etiā si aliās hoc die somnolentiæ meæ pœnas nō raro de-  
di. CLE. Vt cunq; sit, male metuo mihi à ferula, quare  
occasionem aliquā, qua hodie è scholis emanere liceat  
queram. RE. Quā eam? CLE. Scis quid à nobis heri  
contenderit hera nostra? RE. Scio, nempe ut familiam  
hauriendis aquis iuueamus. CLE. Sed quid tum? RE.  
Hæc erit rima satis idonea per quā elabamur, quam ob  
rem tuū erit ubi octauæ signum auditū fuerit, quasi è  
medijs laboribus in ludum ingredi, atq; præceptoribus  
emanendi copiā poscere, hac ipsa, quā dixi caussa assigna-  
ta. CLE. Vereor ut procedat cōmentum, quandoq;  
dem hoc die quo funus magnificū est deducendū, & de  
functi manibus parentandū, uix facultatē hanc dabit,  
& alioqui pauci iā adsunt qui pompā instruant. RE. Tē-  
tandū est, ut cunq; res exeat, ac, nescio quomodo hac di-  
c mihi semper inuisum est scholas adire, non minus quā  
si in pistrinum aliquod mihi sit redeundū. Credo quòd  
pridiam otij sensus adhuc reliquus sic reluctans fa-  
ciat.

DIA



DIALOGI.

DIALOGVS XIII.

BVRCARDVS ET ALBINVS.

De nuptijs, balneis, ac uiscerationibus.

**N**vptias hodie futuras aiunt Albine, tu quippiam  
ea de re audisti? AL. Audiui. BVR. Danda est ope-  
ra, ut & nos è nuptialibus cibis aliquid acquiramus.  
AL. Quod ad cibũ attinet, hodie nihil moror, heri enĩ  
mihi prospexi, unde hunc diem commodè liceat transi-  
gere, sed quod à prandio saltationem in theatro spectare  
non possum, hoc uero est, quod me male habet. BVR.  
At quid uetat, quo minus spectes? AL. Ignoras forsàn in  
hunc diẽ nobis pij cuiuspiam beneficio balneas gratis  
to conductas, à quibus abesse saltationis spectandæ stu-  
dio, an tu putas fore consultum? BVR. Vide, nisi submo-  
nuisses, egregie fuissẽ oblitus, neq; uenisset in mentem  
uiscerationis, quæ & ipsa in hodiernum diem est consti-  
tuta. Valeant nuptiæ cũ sponso, ac sponsa, nos quæ pro-  
pius ad nos pertinent, curemus.

DIALOGVS XIII.

XYSTVS ET ALEXANDER.

## MOSELLANI

De ingenij præstantia contendunt.

**F**elix tu quidem es mi Alexander, cui ingenium tam  
foecundum, tamq; perspicax contigit. ALEX. Est  
nobis Christo deo gratia, non omnino infelix, sed tamē  
non tantum, q̄ forsan tibi uidetur. Fit enim, nescio quo  
modo, ut nostri nosmet pœniteat, aliena ferē suspicia s  
mus. XYS. Et tu quantum audio, aliqd insuper desydea  
ras. ALEX. Quid ni? quando memoriā mihi sentio om  
nino fluxam, & parum tenacem. nam ut facile quæ tra  
duntur percipio, ita non sine maximo negotio percep  
ta retineo. XYS. At ego difficulter intelligo, uerum se  
mel intellecta, diutissime reseruo, & ut uideo, tibi cæ  
reum est ingenium, mihi uero saxeū. Cære quiduis fa  
cile impresseris, at impressum uestigium, statim euanes  
cit, saxo tametsi quid non sine labore insculpitur, se  
mel tamen insculptū, multis seculis durat. ALEX. Res  
te planē confers, sed hoc me male habet, quòd uideas  
plerosq; ingenio numeris omnibus felicissimo prædis  
tos, at uicissim moribus adeo turpibus, ut non inepte di  
xeris eorum ingenia male habitare. XYS. Credo dictē  
rium hoc uetus esse, & olim de Galba, homine ad prodi  
gium usq; deformi, dictum, sic enim audire commem  
ni. ALE. Probe, sed nec ipse, opinor, inepte huc detorsi.

DIALOGVS XV.

SER

DIALOGI.  
SERVIUS ET SULPITIUS.

De signo tintinabulorum, deq; immodico  
somno.

Vin surgis Sulpiti? iam tintinabula ultimum dilu-  
**Q**cularis sacrificij signum dederunt, & non igno-  
ras, quanta hominum frequentia hoc sacrũ pera-  
gatur, ut flagitiũ plane sit, nos in tempore non adesse.

SVL. Iam iam surgã, tametsi caput adhuc sopore graue  
sentio, utinã liceret ad facietatem usq; dormire. Imita-  
rer certe hodie Horatianos illos iuuenes, quibus pul-  
chrũ uidetur in medios dormire dies. SER. At ego te di-  
utius non operior, ne hæc mora mihi plagas lucrifacia-  
at. Ego hinc abeo, tu, quando lubet, sequere, aut tuo pe-  
riculo dormi. SVL. Iamĩã te comitabor, ne festina tan-  
topere. SER. Nihil moror, nunc non est nugandi locus,  
à prædio uero, ubi pro more nobis à studijs remissio da-  
ta fuerit, nugabimur.

DIALOGVS XVI.

HENRICVS ET FRIDE-  
ricus.

De ludendi ratione agunt.



## MOSELLANI

**T**u nobiscum pila ludes Friderice? an cum istis cursu mauis certare? FRI. Mallem cum uno et altero iucundo sodali deambulatū ire. HEN. Quin tu ante paulisper pila colludis, postea & nos una tecū deambulabimus. FRI. At ego huiusce ludi non admodū sum peritus, nam neq; caute pilam mittere, nec missā manu satis certa excipere sufficio. HEN. Nihil est, quod hac gratia sis sollicitus, ipsa rei exercitatio te satis, quid facto opus sit, admonebit. Quod si hinc modis omnibus abhorres, age ludū minoris negotij, nempe globularē, incipiamus. FRI. Quando ita uultis, nō recuso, tametsi præter risum spectantiū nihil me lucraturū scio. Siquidem ubi decies aberraro, uix semel tandem ferio, idq; casu magis, quā arte. HEN. Non magni refert in hoc certamine uincas an uincaris, neq; enī caput agitur, aut pro pecunia certatur.

## DIALOGVS XVII.

IVLIANVS ET DAMIANVS.

De quæstionibus commissorum, quæ die  
Veneris in ludis exercentur.

**E**h O noster Damiane, adest rursus dies, quæ ego non minus nobis nefastū & execrandū puto, quā olim Ro-  
ma

## DIALOGI.

mani illum, quo in Cannensi pugna tot Romanorū milia ab Annibale trucidata. DA. Quid ita. Nū mali alia quid huic scholæ ex hoc die impendet? IV. Et tu nescis, præsertim tot ānos in ludis uersatus. DA. Qui scire possum scholæ huius consuetudinē nuper admodū huc profectus? IV. Quæstiones hodie fiunt in ludo non aliter, q̄ quadā carnificina. DA. Quid narras? IV. Vera quidē nā de singulis, quæ per totū septimanæ cursum quoquo modo cōmisimus, hodie quisq; pro se pœnas dare cogimur. DA. At qui scire possunt præceptores, quæ singuli nos designemus? IV. Arte quadam oīa expiscantur, ut nihil illis occultū esse possit. DA. Quid ita. Num diuinationū sunt periti? IV. Minime, sed alia uia eodē perueniunt, nam aliquot clanculū in hoc selectis, provinciam dant, nos suos cōmitones deferendi prodendiq; ut nusquā quicquā omnino tuto agere queamus. Semper enī uerēdū, ne quispiā ex eiusmōi Coryceis nos auscultet, et lupus sit in fabula. i. ille ipse nobis ignorantibus adsit, q̄ quasi conductitiū proditor oīa ad præceptorem deferat. DA. Hoc illud forsā est, quod Lupū audio appellari, nā nomen solū in ea schola, ubi āte egi, iactabatur. IV. Is ipse est ille clancularius lupus, quē nos miselli nō minus odiosum habemus quā ferā illā quadrupedē horrent oues. DA. Vereor ne & nos hodie deferat, quāobrem cogitandū mihi est, ut si forsā reus fuero, uel me expurgem, uel quā minima pœna defungar.

# MOSELLANI

## DIALOGVS XVIII.

PETRVS ET PAVLVS grauit̃ ferunt deſyde-  
rium feriarum, deq; capite lauando agunt.

Vam uellem hunc diem abiſſe, ut à tot totius ſep-  
**Q**timanæ laboribus, ac etiam bidui fame, ad feri-  
as demum, & carnes liceat redire. PAV. Impati-  
ens es moræ, mi Petre, qui cum totã pene ſeptimanã ex-  
pectaris, diem dimidiatum durare non potes. Quid au-  
tem facies, ubi totis quadraginta diebus à carnibus eſt  
abſtinendum? PE. Recte quidẽ obiurgas, ſed nescio quo  
modo, quanto uiciniores ſunt feriæ, tanto magis earũ  
me premit deſyderium, ſed nunquid aliud dicere uiſ?  
Nam ego hinc me in tonſtrinam conferam caput lotio-  
ne curaturus. PAV. Et ipſe lauandum caput exhiberẽ,  
ſi lotionis mercedem tonſori perſolucere poſſem, nunc  
autem tantum habeo numum. PE. Sat eſt, nec ipſe plu-  
ris lauo, tametſi raro hos facio ſumptus, nam per anni  
circulum uix ſexies lauo. PAV. At ſæpe caput à ſordis-  
bus repurgares, aiunt enim corporis emundatione &  
ingenium nitidius, quaſiq; purgatiuſ reddi. PE. Sic qui-  
dem fertur, idq; propterea quòd ſcientiarum ſedem in  
capite, utpote rationis domicilio, collocant, quare ocy-  
uſ eamus. PE. Quando lubet.

## DIALOGVS XIX.

GE



## DIALOGI.

### GEORGIVS ET CHOVRNRAVS.

De canticis, dcq; ferijs diui Martini.

**A**Gemi Chunrade, quo cantico per hanc hyemem stipem colligemus? Etenim in hac urbe mos est, ut scholastici aliquot coniunctim compositis in hoc cātilenis, diuitum conuiuia exhilarent. CHO. Tuū hoc fuerit disquirere, qui rei musicæ peritiam habes, quiq; huius scholæ melius quàm ego, tenes. GE. Quādo in me hanc curam reijcis, aliquid minime uulgare despiciā. Sed die ab hīc octauo quid fieri soleat, nosti? CHO. Dic quid? GE. Erunt tum feriæ præcidaniæ diui Martini. CHO. Quid tum? GE. Est tunc messis nobis scholasticis uberrima, siquidem in eius diei uespera non esculēta solum nobis largius solito dantur, sed et stipem egenis dari hostiatim est receptum. CHO. Bene mecum agetur, quandoquidem corrasurum me spero, quo hyemem cōmodius transigere ualeam. GE. Ita spero quidem, quare ad tempus, ut præsto sis, uide.

## DIALOGVS XX.

### MARTINVS ET VALERIVS.

## MOSELLANI

De ieiunij uiolata religione, deq; diuæ Catharinae, studiorum præsidis numine.

*piaculum in  
refectum nihil  
et quicquid ap-  
tem p-beret q- barri-  
finitione po-  
canti :-*

Vid agis omnium impurissime? VA. Quid adeo in me stomacharis, qui aliud facio nihil, quam q- ientaculum capio, an tu ientaculum perinde ducis, ac piaculum. MAR. Quasi non sat graue sit piaculum in homine Christiano ieiunij religionem uiolare. VA. Et hodie est indictum ieiunium, dic quo nomine? MAR. Scelestè, nescis cras ferias beatæ Catharinæ artium præsidis agendas. VA. At non putaram præcidat nias has ferias ex ecclesiæ instituto sacras. MAR. Quid tum, consuetudo recepta est pro lege, & ut nulla sit cōsuetudo, nobis tamen qui literas sectamur, quibus hæc uirgo præsidet, hic dies ieiunio religiosissimo fuerat cōlendus. VA. Ieiunabo ergo deinceps uel hoc sumpto ientaculo, neq; enim lautum spero prandium, & ut uulgo dici audio, bis interdium male pasci, pro ieiunio est. Tametsi ut tibi me aperiam, hætenus Christum uerum sapientiæ præsidem putauit, ut qui sapientiæ nomine subinde in ecclesiasticis concionibus celebretur. MAR. Noqua quædam inducere conaris, at ego communi omnium uia ingredi malo. VA. Nō audisti illud Pythagoræ, Per publicam uiam ne ambules. MAR. Molestus es, tu tuū, ego meum iter ingredi ar.

## DIALOGI.

### DIALOGVS XXI.

HIPPOLYTUS ET CLETUS.

De frigoris iniuria queruntur.

**O** Quàm sunt felices, quibus per opes iam licet dormire ad caminũ, aut calefactum hybernaculũ adsedere. CLE. Ediũerso quàm nos infelices, qui miseri nullis pellibus, imò nullis penè uestibus aduersum frigus iniuriã armati per medios hymbres niues & glaciẽ, hostiatim quærere uictũ cogimur. Sed solatur me illud Flacci.

Qui cupit optatam cursu contingere metam.

Multa tulit, fecitq; puer, sudauit & alsit,

Abstiniuit Venere & Baccho, qui Pythia cantat.

Alioqui si similis esset exitus illorum & noster, non esset, cur non iniurium deum dicere, qui tam iniquæ res humanas administraret. HIP. Quin taces, ne quid fero eius in Deum effutias.

### DIALOGVS XXII.

LVCANVS ET STATVS.

De feriis diui Nicolai, deq; creando Episcopo.

Vid tu nobis adfers noui mi Stati? LV. Nihil, sed

**Q** in hoc te conuenio, ut de cõmunibus studijs fabulemur. STA. Gratus ergo mihi tuus est aduētus, adside hũc nobis. LV. En adsideo, scis quid in diui Nico



## MOSELLANI

lai ferijs apud nostrates fieri soleat? STA. Qui ipse possem scire, cum illic fuero nunquam? LV. Dicam ergo paucis. Qui ludū illic literarium frequentant, ex ludi magistri præscripto quempiam e suo grege episcopum creant, cumq; magna pompa domū deducunt. Et statotempore in templum reducunt. STA. Quid commodi inde capit nouus ille et factitius Episcopus? LV. Nescio, nisi quod conuiuio tandem, nescio cuius sumptu instruetur excipitur, et tamen lautissime tractatur. STA. Nō et interim, dum in magistratu uacationem à discēdi minere habet, aut æque ac cæteri manum ferulæ subdit? LV. Aequè omnino adeo ut non sit magis episcopus, quā sunt hi reges, qui in tragœdijs, Agamennonis aut Priami personam gerunt. STA. Eiusmodi honorem mihi ne optarem quidem.

## DIALOGVS XXIII.

IACOBVS ET THOMAS.

De uarijs spectaculis colloquuntur.

Q. Vid cras sit futurum audistin? THO. Nihil equidem, nisi quæ aliās fieri consueuerunt. IA. De spectaculis nihil? THO. Nihil planè, num edentur aliqua? IA. Edentur, et quidem uaria, nam funābulos duos adesse audio, qui cras sui artificij miraculum ostentabunt. Tunc Sarmatas aliquot ipse, qui immanes ursos ad exiguam stipem iuxta lituorum cantus saltitantes exhibebunt.

THO.

## DIALOGI.

THO. Curabo quoquo modo ut & ipse intersim, etiam si me ipse intrudere debeam. IA. Vix poteris, quandoquidem qui non numerant, foras quatiuntur. THO. Falla ipsos ianitores. IA. Ad hæc princeps ipse in foro paria aliquot equitum exhibebit, qui inter sese infestis hastis concurrent. Post quos circum ingrediuntur, item equites à calce ad uerticem usq; armati, quos cataphrattos uocant. Hi cateruatim sine ullo aut ordine aut, arte alius in alium irruet, & se mutuis ictibus ab equis deiiciant. Nam in hoc circus undiq; est circunseptus, & ne quicquid ceciderint, grauius lædatur, fimo istratus. THO. Quæso te, uoluptatem, ex tam furioso & minime iucundo certamine capiunt isti? IA. Quid? nullas non lautitias præ hac uoluptate contemnunt, præterquam, quod hoc tyrocinio ad serios hostium congressus præparantur, & quasi animantur. THO. Vt cunq; sit, spectabo et ipse quo modo res agatur.

## DIALOGVS XXIII.

CHOVNRADVS ET AEGIDIVS.

De ieiuniorum ratione differunt.

**M**Ale sit istis, nescio quibus, qui totum pene annum ieiunijs onerant. Neq; enim satis fuit eis quadraginta dies perpetuo Christi ieiunio esse sacros, nisi insuper quarta quoq; anni parte, aliquot

C

## MOSELLANI.

dies nos macerassent. Instat rursus septimana per abstinentiā transigenda. Quod si mihi tanto apparatus prandium apponeretur, quanto illis qui ieiunia hæc induxerunt, non admodum grauatum eis parerem, nunc cū uix toto anno semel rugientem stomachū exatiem, adhuc ieiunijs uexor. AEG. Quid ita stomacharis mi Chounra de in sanctos ecclesiæ patres? qui hæc omnia bono animo statuerunt non nobis, qui hæc nec præstare per ætatem adigimur, nec per inopiam possumus, sed sui similibus, hoc est diuitibus istis & delicatis. CHO. Qui scis hæc? AEG. Superiori anno è quodam concionatore audiui, qui diuo Hieronymo, quanquā acerrimo ieiuniorū exactori, displicere aiebat, maxime in teneris ætatibus longa & immoderata ieiunia. Ne quemadmodū ipse scriberet, ante pedes deficiant, quācurrere incipiāt, quare tantum ieiuniorum modū imponendū, quantum ferre poterimus. CHO. Habeo gratiā diuo Hieronymo qui pauper culis nobis & impacienter esurientibus patrociniatur.

## DIALOGVS XXV.

### PENIVS ET FRANCISCVS.

De ferijs natalitijs Christi confabulantur.

**E**T gaudeo, & doleo mi Francisce, festa hæc natalitia appetere. Gaudeo quidem quod hæc feriæ omnia



## DIALOGI.

nia leta & festiua secū apportāt, doleo aut, quod scho-  
lasticis nobis in addiscendis horū festorum cantionibus  
grandis est exhauriendus labor. Præterea totis diebus  
in templis algēdum. Postremo & illud uereor, ne si ma-  
tutina sacra alto nimis sopore detentus neglexero, &  
plagas mihi lucrificiā. FRAN. Vera sunt hæc quæ dis-  
cis, attamen quando hanc conditionem accepimus, ad-  
uigilandū nobis erit, & oīa fortiter perferenda, nam  
& peiora his passi sumus, dabit Deus his quoq; finem, ut  
taceam hos nostros labores in pietatis cultum cedere.

PE. Certe plus satis delicati essemus, si nontantum mo-  
lestiæ uel pro solo Christo deuorarem, cuius respec-  
tu tot infantium innocens ætas crudeles barbarorum  
militum gladios est perpeffa, cuius rei memoria & his  
ferijs coniuncta est. FRAN. Sed illud quæso, quid sibi  
uult, quod sacrificuli in diui Ioannis ferijs popularib.  
uinum è sacratio calice propinant. PE. Nescio equidem  
nisi quod audiui hoc poculum, utpote sacrū antidoti ui-  
ce esse contra ueneni pericula. FRAN. At ego nolī hac  
fiducia cicutam bibere, quantumuis sit hoc poculū, ut  
diciſ, ſacrum.

## DIALOGVS XXVI.

### BRVTVS ET PETRVTVS.

De noui anni ingressu loquuntur, deq; mis-  
sitandis strenulis.

## MOSELLANI

**F**Austum annū hunc nouū & felicē tibi precor mi Petrucci. PE. Et ego, ut cū scēnore tibi reponā non hūc solum qui iam ingreditur, sed omnia totius uitæ tēpora beata tibi opto. BRV. Tametsi malletm strenulam mihi potius dares, quā magnificam illam & solennem īpreccationem, PE. At quas strenas dare possit Petruti us, q̄ prāter pauculos libellos habet plane nihil? BRV. Libellum quempiam dares, quādo belle quadrat, ut homo literis deditus, literarium quoq; det munusculum. PE. Verum hac liberalitate studiorum meorū iacturā facerem, quod nec ipse, si modo amicus es, nobis suades bis. BRV. locabar tecū, & te, quid animi haberes uolebam pertentare, cum has consuetudines, nec ipse magni faciam, ut qui iam sepe audiuerim eas nobis ē gentilitate relictas. Cuius generis esse audio, quod in quibusdā Christiani orbis regionibus pridie feriarum, quæ tribus Magis sūt sacre, singulæ domus singulos reges creant, nā hæc omnia ex Aethnicorū saturnalibus in hæc usq; tempora defluxisse apparet. PE. Quia trium Magorum mētionem fecisti, uelim, sicubi aut audieris, aut legeris ipse mihi expedias. Primū, quid sibi uelit, quod eos duos alij reges, alij Magos appellant. Quod posterius ego de solis maleficis & prāstigiatoribus dici putabam. Nam utrunq; ut nosti, in sacris canimus, deinde cur hæ feriæ græco uocabulo *ἐπιφάνεια*, nuncupentur. BRV. Dicā quæ super hac re partim ex præcepto

re

## DIALOGI.

re dictante, partim concionatore superiori anno exce-  
pi, Principio magorum appellatione Chaldei nō ut uul-  
gus putat, præstigiatores, sed uiros sapiētes nuncupāt,  
et secretorum naturæ conscios, quorū professio à qui-  
busdam etiam Latinis magia naturalis dicitur, sed quæ  
hæc res finibus suis non contenta, temporis progressu in-  
curiosam quandam dæmonum imposturam est delapsa,  
cœpit honestiss. artis uocabulum probro esse, quod autē  
ijdem hi reges in psalmi prophetia dicuntur, non sic est  
accipiendum, ut hodie sunt reges, hoc est, tot ditionum  
potiētes, sed qui quoquo modo magistratū gerunt, sūt  
q; numero uulgi exempti. Quo modo et Hesiod. corru-  
ptos iudices et aduocatos βασιλείας δωροφάροις ap-  
pellat. Porro apud ueteres Theologos græcos, ut Gre-  
gorium Nazianzenum, audio ipsa natalitia festa τῶν  
φάσεων dici consueuisse, quod in his Deus homo apparu-  
erit. Verū q; et magorū ferias hoc uocabulo celebrāt.  
Hinc opinor esse, quod illis dux stella apparuerit. Ha-  
bes quæ ego de hac quæstione audiui. Plura si uis, ex do-  
ctoribus require.

## DIALOGVS XXVII.

VALERIVS ET NICOLAVS.

De cæreis in ferijs beatæ uirginis gestandis agunt.

**Q** Vid tu cæreum non habes mi Nicolae? **NICO.**  
Vnde haberem, qui nec pecuniam, qua uictum



## MOSELLANI

emere possim, habeo? Sed si domi apud meos agerem, nugas eiusmodi mihi pararet mater. VA. Et tu nugas uos care audes res sacras? NI. Quid ni? neque enim statim fuero hæreticus, etiã si nullũ gestem cæreum, maxime cũ non sit unde emã, tum & Christo putarem longe fore gratius, si sumptus, quos cæreis emedis facimus, in pauperũ usus cõuerterentur. VA. Atq; est hæc laudabilis cõsuetudo? NI. Est omnino, sed non adeo, ut per ea meliora, & magis christiana officia negligi debeant. VA. Recte putas, nã & ipse sæpe stultã muliercularũ pietatem risi, quæ suffigedis etiã quotidie cæreis triginta sex, adeo sibi placent, ut per hoc cœlũ se demereri credant, quantumuis fortiter in plateis pauperes esuriant.

## DIALOGVS XXVIII.

### FABIANVS ET FRANCISCVS.

De Bacchanalibus Christianorum fabulantur.

Q. Vid caussæ est Francisce, q; heri ludũ nõ es igressus? FRAN. Grauius ex capite laborabam, ut lucẽ ferre non possem. FA. Belle morbum excusas, quando uulgare iã est scholasticos, si quando uel discendi sudorem horreant, uel ferulã metuant, ignauie suæ uoletudinẽ prætexere, ut scholasticus morbus pro assumulato & conficto, iã pridẽ in prouerbiũ abierit. FRAN. Quid alij faciant nescio, certe quod ad me attinet, mallem desies ferulam pati, quã semel in eum dolorẽ recidere, et  
tis

## DIALOGI.

tiam si uix dum plane reualui. Sed quid tute iā hic uer-  
 saris? an non hora iā est præceptoribus auscultādi? FA.  
 Est, sed ob hæc Christianorū quasi Bacchanalia tridui  
 missionem nobis dedit præceptor, uetuit tamē graui, si  
 quis, dicto, audiens non fuerit, proposita pœna, ne quis  
 opificum istorū manu ariorū exemplo larua personæ-  
 tus uicatim cursitet, quod hæc insania cum bonis omni-  
 bus, tum maxie Christianis sit indigna. FRAN. At ego  
 iam dudū laruā in hunc usum domi inclusam adseruo.  
 FAB. Vide quid agas, nam de laruis cautū est. Porro cō-  
 potationes, & cantiones ciuiles indulget. FRAN. Paren-  
 dum erit, alioqui post inpermissa gaudia fortiter plo-  
 rabimus.

## DIALOGVS XXIX.

### VITVS ET SEVERVS.

De ieiunio, deq; confessione quā uocant.

Q. Vid istud portendit Seueræ, q̄ ita cogitabūdus in-  
 ambulas? nā mihi arduum quiddā meditari uideris. SE.  
 Rogas? quasi non ipsum hoc tempus te quid agerem, do-  
 cere possit? VI. Ieiunijs ergo crebris te maceras, ut eius  
 modi faciem exhibeas? SE. Minime, sed quæ parū religi-  
 ose in Deum conditorem, ac eundem liberatorem male  
 gratus admisi, ea nunc in memoriam reuocare studeo.  
 Iam enim tempus simul, ac ecclesiæ dictum postulat, ut  
 peccata nostra diligenter excussa, tutis sacerdotū auri-

## MOSELLANI

bus censenda, deponamus, quo ab eis de peccatorū ratione edocti, uidelicet quæq; leuia, quæq; graua sint, deinceps cautius uiuamus. VI. At incurius ego ne semel quidem adhuc de re tanta cogitauī. SE. Hac ratione nihilotes melior, quin mature nobis hoc munere defungendū est. Nimirū ut hoc confitendi onere, quo nullum est grauius, liberati, diui Gregorij, studiorum præsidis, ferias agamus expeditiores. VI. At istis ferijs quæso te, quid tandem agitur? SE. Quia is diuus studijs, ut dixi, præsideri putatur, pueri qui suam ætatē in literis agere uolunt, eo die in hanc nostram militiam nomina dant faustis, ut ominantur, auspicijs. VI. Et quando hæ erunt ferie? SE. Die, sicut opinor, ab hinc decimo. VI. Quando ita suades, et ipse mihi oricularium sacrum (sic enī uocant nonnulli eruditi) quæram, in cuius sinum mea delicta effundam. SE. Si lubet, eū accedendi dabitur facultas, quæ ipse iam semel atq; iterum diligentem sum expertus. VI. At ego malle oscitantem aliquē, quæ non magno negotio in aliquot criminibus fallere possem. SE. At hoc non est Christianum agere, sed uulpinā fraudulentiam referre, uerum tu uideris.

## DIALOGVS XXX.

MARCELLVS ET ANTONIVS.

**S** Aluc Antoni. AN. Et tu mi Marcelle. MAR. Quid est quod ita discurre? quem quæris? AN. Quæro qui mecum ruseat, mihiq; in emendandis ex more ouis sit



## DIALOGI.

**Socius.** MAR. At hæc consuetudo parua est, & indigna eo, qui se liberalibus studijs addixerit. Quid enim seruilius, quàm decem ouorū gratia agrestium caulas hostiatim obambulare, ac interim domi lectionum iacturam facere. AN. Sed unde famempellam, si non cibos undecunq; conquirere licet. MAR. Hic in urbe quantū naturæ satis est, nancisci potes, nam quorum beneficio totius anni uictum conquiris, eorundem benignitate et paucos dies transigere posses. AN. Frustrate appello, seuerior es, quàm ut tecum rem habere uelim, ipsa es sapientia. MAR. Age age ut lubet.

### DIALOGVS XXXI.

#### PAVLVS ET LVCAS.

De sanctorum communione colloquuntur.

**O** Bsecro te mi Luca, modis omnibus nos excutiamus, atq; ab omni peccatorum sordē poenitentiæ scopis repurgemus, ne ad tanti principis, qui semel natus tu nos perdere potest, mensam, illotis quasi manibus accedamus, & panem illum cœlestem, ac admirandū polluto ore, imò & animo sumamus, de quo heri tam pia, tanq; frugifera disseruit ludimagister. LVC. Equidem pro mea uirili ad hoc enitar, sed rogo, quid nam de hoc mysterio disputauit præceptor? Nam ipse non interfui. PAVL. O Miserum qui talia negligis. LVC. Adesse nō quini, alibi occupatus, quàm obrem uehementer oro & obtestor, ne mihi rem adeo salubrem inuideas.

## MOSELLANI

PA. Aiebat tantam esse uirtutē huius admirādi cibi, ut qui eo rite uescerētur, fierent unū corpus atq; unus spiritus cū Christo, sicq; in Deum, Deiq; filiū abirent. Sed si quis impurus contingat, eū non salutē, sed extremam animæ perniciē sibi inuenire. Hortabatur ergo nos omnes, ut his diebus peccatores cū Christo in cruce moremur, quo felicius & synceriori cum gaudio, unā cum eo in uitā transeamus. Hoc enim dicebat significari per hæc appetentia nunc festa, quod Pascha Hebræis transitum à morte peccatorū ad uitā uirtutum sonet. LV. At interim, quid sit de placentis, & id genus alijs bellarijs quæ ad imminentes has ferias parare cōsueuerunt? Nō & de illis quid audiuiſti? PA. Apage tuus animus iā est in placentis, quum hoc temporis articulo Christus olī de uita sit periclitatus. Placentæ, atq; eius generis illecebræ aliæ, suo loco sermonem dabunt, nunc de alio cibo solliciti esse debemus.

## DIALOGVS XXXII. VRBANVS ET CHILIANVS.

De lustratione urbis & aruorum fabulantur.  
uid est Chiliane, quōd tanto molimine plateas & uicos omneis uerrunt, num princeps quispiā hūc est uenturus? CHI. Minime, sed quiddam est cras futurū, cuius gratia merito hic fit apparatus. VR. quid hoc, quæso? CHI. Solenne iam est, crastino die urbē corpore Cristi lustrare, si quidem primarius hic sacerdos

## DIALOGI.

sacratissimum hoc corpus circum mœnia gestabit, uni-  
uersa sacerdotum manu, atq; item populo omni à tergo  
sequentibus. VR. Sacra forsân erunt, quæ nonnulli am-  
burbialia non inepte uocari uolunt. CHI. Erunt. VR.  
At quando agentur Ambaruaria? sic enim uocantur q̃  
apud Aethnicos erant Robigalia, Paliliaq;. CHI. Perẽ  
die. VR. Num & nos eis sacris adesse oportet? CHI. Ma-  
xime, pariter & clericorum ordinem omnem. VR. At  
apud nostrates soli agrestes sacrificio præeunte agros  
obequitant. CHI. Suus cuiq; regioni est mos, qui pro le-  
ge est habendus.

### DIALOGVS XXXIII.

#### LEOPOLDVS ET

Seuerus.

De spectaculis comœdiarum, tragœdiarumq;  
exhibendis fabulantur.

**S**Cis Seuce, quæ spectacula die crastino, q̃ est à fe-  
srijs sacratissimi corporis Christi octauus, edi cons-  
ueuerint? SE. Qui ipse scire possem, cum superiori an-  
no non adfuerim? LE. At audisse ex alijs poteras. SE.  
Quæ ad me parum attinent, ea nō magnopere soleo ex-  
quirere. Sed dic oro, quid tandem est, quod iactas? LE.  
Tragœdiam eorum cruciatuum, quos pro nobis tulit  
seruator Christus histriones agent, sunt enim adhuc de-  
lecti aliquot. SE. Quæso te omnibus etiã adhibitis per-



## MOSELLANI

sonis. LE. omnibus omnino. SE. Ipse in hac fabula mallē  
durissimi militis aut carnificis personam gerere, quā  
ipsius Christi, nam tametsi, ut conijcere possum, res fis  
etē representabitur, sic tamen abire non potest, quin is  
qui Christum refert, multas interim molestias in se res  
cipere cogatur. LEO. Et ipse in hac fabula spectator  
esse malo, quā actor, ut cūq; res interim agatur seria

### DIALOGVS XXXIII.

#### BASILIVS ET GREGORIVS.

De coronis gestandis, deq; earum uario genere  
colloquuntur.

**V**Nde tu te proripis Gregori? aut ubi hanc coronam  
nam rosaceam es nactus? GRE. E foro ueni, mi  
Basili, ubi sertum hoc numo mihi coēmi. BA. At in quē  
usum. GRE. Animus est eam coronam capiti impositam  
gestare, Nonne uile tibi uidetur, tot rosas unico numo  
lo parari? BA. Et te tantum asinum non pudet, puerorū  
ritu coronatum incedere? GRE. Puderet? Grandes na  
tu, et cani etiam hic gerūt. BA. Nihilo ergo sunt graui  
ores, forsā hunc morem à Græcorum mollitie sump  
serunt, quos apud Homerum subinde καρπομόωντας  
audio dici, GRE. Vnde sumpserint equidem nescio, hoc  
scio quod gestant. BA. Num solas rosaceas gerunt, et an  
violaceas pariter et liliaceas, aut etiam rosmarino, uel  
amaraco intertextas. GRE. Omnis generis flores, ac q  
do

## DIALOGI.

doramenta concinnant. BA. Faciant ut lubet, ego nihilo  
lipendo istas nugas, tantum abest, ut pretio emere ueli,  
quod si pecunia superesset, uerum butyrum emere mas-  
sim, hoc enim in alimentum cederet, cum sertorum si os-  
dorem excipias, nullus planè sit usus.

## DIALOGVS XXXV.

### RHAPHAEL ET SERVATIVS.

De ferijs diui Urbani fabulantur.

**V**tinam alas mihi sumere liceret, ut hinc domum  
auolare possem, etenim nimis quàm cupio crasti-  
num diem in patria transigere, quam facultatem magis  
no emere non recusarem. SER. Quid hic sibi uult? tu  
te homine exuto in uolucrum mutam uis degenerare  
aut quid noui accidit? quod tam repentinum tuum iter  
postulet. RHA. Rogas? nescis cras ferias agi diui Urba-  
ni? SE. Noui, sed quid tum? RHA. Hunc diuum eodè pe-  
ne ritu, & iisdem ceremonijs colunt nostrates, quibus  
Aethnici olim Bacchum, ut quæ illis erant Bacchanas-  
lia, nobis penè sint Urbanalia. SE. At in quem usum fa-  
ciunt hæc Christiani? RHA. Putant hoc diuo sic placato,  
felicius prouenire uuas. SER. O stolidos homines,  
qui sanctorum numina crapulis, ac compotationibus  
demereri se credunt, cum illi abstinentia & sobrietate  
te principi Deo placuerint.

# MOSELLANI

## DIALOGVS XXXVI.

### CORNELIVS ET GVILIELMS.

De commodis ac molestijs uariorum temporum  
differunt.

**V**T nihil est usq; ex omni parte felix. GV. Quid stomacharis tecum mi Corneli? COR. Non iure stomachor, qui me tot malis in hoc imundo mundo obnoxium experior? GV. Quid est, de quo præter cæteros a deo queri possis, nisi forte paupertatem in ius uocas. COR. Quasi hoc solum sit malum, etiam si grauissimum uides, et opinor sentis, ut nihil non sit aduersum, hybernis temporibus frigore concutimur, nunc æstus et caniculæ rabies nos excruciat. Interdum quidem ob annonæ caritatem, et nostram paupertatem fame ac siti laboramus, ut taceam interim, nusquam non culices et muscæ nobis obuolantes, et corpusculum exugentes, nos et te uero cum cimicibus ac pulicibus bellum gerimus. Ad hæc miseros exterrent, iam fulgura, iam fulmina, iam tonitrua. Mox et Autumnus sexcenta morborum genera effundet, nonnunquam morborum omnium pestilentiissimum pestem, adde, quod huius temporis occasione plerique nostri ordinis, dum stulti frigida lauare uolunt, in rapidis et profundis fluminibus, capitis iacturam faciunt. GV. At tu nature parum gratus incommoda quidem, quæ secum adferunt æstiu mensēs, accurate recensēs, com-

moda



## DIALOGI.

moda uero, quæ simul præstat præteris. COR. Quæ ea sunt quæ so? GV. Rogas? primū nec igne, nec uestibus ad modū est opus, deinde tēpus hoc tot frugum genera donat siliginem, triticū, hordeū, tot legumina, fabas, pisa uicias, tot poma, pyra, pruna, mēspyla, nuces, iuglādes auellanas, castaneas molles, racemos, super oīa uero dulciſsimū mustū. An hæc parua tibi uidētur æstatis et autumnī munera? Videris mihi ex eorū esse grege, de quibus Sen. eleganter dixit, Nemo beneficia in Calendariū scribit. Postremo cogitandum semper, sic placuisse naturæ conditori Deo, ut in hoc mundo nihil sit hominibus omni ex parte beatum, quo uidelicet ex his mundi perturbationibus ad aliam patriam aspiremus.

### DIALOGVS XXXVII.

PANDVLPHVS ludimagistri minister. HIERONYMVS scholasticus. LVDIMAGISTER. Consultant inquam potissimū academiam studioso sit commigrandū.

PAN.

Q. Vid tu hoc ante ostium Hieronyme, aut quid hic tibi negotij est? HI. Ludimagistrum conuenire uolebam, Sed pulsare cunctabar, ueritus, ne intempestiue fortasse uenirem, quare te pro ueteri nostra consuetudine rogo, ut hic me ad stare significes. PAN. Faciam, tu hic tantisper morare, dum quid rerum sit, huc renūcio, Here, quod iniunxeras diligenter est curatū. LV. Bene factum. Atqui is est, qui cum pro foribus fabulan

D

## MOSELLANI

tem te audiui? PAN. Scholasticus quidam, nomine Hieronymus, tibi familiariter notus, qui te, si modo tempus est, coram alloqui cupit. LV. Intromittatur, iam nunc quid uelit, conijcio. HIE. Salue humanissime preceptor. LV. Et tu saluus sis optime adolescens, sed quid est, quod me uelis. HIE. Paucis dicam, Quia iam biennium te in hoc ludo doctem audiui, utriusq; literaturæ prima rudimenta tua ope ut cunq; percepi, hortatur nunc me tum parens, tum etiã hæc mea ætas maturior, ut hic in academiam aliquam ad uberiores ingenij cultum capiendum me conferam. Hoc ut felicius faciam, tuo consilio opus est, nã inter tot, ut uocant uniuersitates, quot iam olim sunt institutæ, & hodie passim nouæ exoriantur, mihi eiusmodi rerum ignaro, difficile plane est eius quæ omnium sit instructissima, & meis studijs accommodatissima delectum habere. LV. Prudenter hic deliberas Hieronyme. Sunt Academiæ, idq; in germania, quas uehementer probem, sunt item quas cupiam uel omnino non esse, uel in totum immutari. Vt enĩ in re militari duci dux, & militi miles, ut in republ. senator senatori, et ciuis ciui, artifex artifice, ut deniq; homo homi, sic schola scholæ, doctor doctori, magister magistro præstat. Quod discrimen qui non aduertit, operã & oleum (ut aiunt) plerunq; perdit, ac, ut certum aliquid quod hic sequaris habeas, in hac deliberatione spectandum erit, non quæ magnificis ædificijs, tametsi & hæc decoris aliquid

## DIALOGI.

liquid addunt, sed optimis omnis generis præceptoribus sit instructissima. Primum, quæ trium linguarum professores habeat, & doctos, et bonos, hoc ut uelint, illud ut possint recte docere. Siquidem latinam, Græcam, & Hæbraicam linguas in Christianorū scholis doceri potestificæ leges iubent, & ueterū theologorū exēpla suadet, ac deniq; Christianæ reipublice usus exigit. Habeat deniq; theologos, si nō plures, unū saltē, aut alterū cum scripturarū intelligētia, tū uitæ sanctimonia egregie probatos, tū iureperitos nō minus prudētia, q̄ & facundia laudatos. Ad hæc medicos, quos naturaliū rerū profunda cognitio, & curæ fides perspecta cōmēdet. Postremo philosophos, nō qui sophisticā rixandi pertinaciam ex ineptis barbarorū cōmentarijs inculcent, sed qui philosophando Platonis maiestatem, acumen Aristotelis, Theophrasti eloquentiā referāt. Quanq̄ autē gymnasiū eiusmōi minoris negotij est describere, q̄ usquā iuenire, ad præscriptā tamē imagiū utcuq; accedūt hic in uicino sitæ, LIPSIA et VVITTENBERGA. Nec ERPHORDIA cuiq̄ est aspernanda, ut nec BASILEA. Super oēs uero triū linguarū professiōe floret LOVANIVM schola, uel hoc noīe omnium felicissima, q̄ magnū illū et sapientie & eloquentiæ principē hēt ERASMV. Et summū illud ecclesiasticæ dignitatis ornamentū. Albertus cardinalis, magnū qddā Mogūtiae suæ molitur, quod si processerit, erit quo se Germania exteris hōibus uenditet.



## MOSELLANI

Porro illud in primis tibi cauendum, ne ad sublimes illas professiones, quas vocat, illotis ( ut aiunt ) pedibus irrumpas. Quin modis omnibus curandum, ut utriusque literaturae mediocri cognitione praeparatus accedas. Sic enim futurum, ut in disciplinis his grauioribus citius et facilius quoad tēdis, peruenias, et rectum in rebus omnibus iudicium consequaris. Hoc qui caret, frustra se aliquid feliciter dicere sperabit. HI. At in eiusmodi scholis receptum audio, ut scholasticorum quisque praceptorē quempiam sibi deligat, quo familiariter utatur non tantum ad literarum studia, sed et formandos mores, hic quid mihi faciendum suades? LV. Quid aliud, quam ut antequam te alii cui in disciplinā dedas, diuitum istorum delicias imiteris. Qui cum multa uini dolia in cellis habeant reposita, non sitim est quouis bibunt, sed pitifando omnibus ex ordine degustatis, quod firmissimum fuerit et suauius hoc demum in palati sui usum relinunt. Quin ergo et tu, cum ex alijs sciscitaris, tum multos eximios eiusdem professionis doctores audiendo, exploras ipse cui potissimum ingenij tui solum rectissime excolendum loces. Tametsi sunt et aliae coniecturae, quibus in hoc uti possis, ut si cui suae lucubrationes insignem peperere famam, si quae eruditorum calculi aliquot probent, sicuti ab alijs eiusdem musae aemulis insignite inuideatur, si quem uel iudicium principis, uel Reipublicae consensus à contemptu uindictet, si cui magna sit lectissimorum iuuenum frequentia, si qui discipulos aliquot egres-

## DIALOGI.

egregie doctos reddiderit. Deniq; si qui Pythagoræ exemplo, non quenq; statim in disciplinam suam recipiat, & alijs plura ac meliora pluris quoq; doceat. Caue enī committas ad quenquā te alliciat sumptus uilitas, aut à quoquā deterreat impensæ magnitudo. Quādo fere fit ut qui paruo docēt parua, qui magno, magna quoq; doceant. His indicijs si prudenter uteris, uix unquā tibi imponet quisquam. Cætera rerum usus optimus magister ætatis progressu te facile edoccebit. HIE. Sat est. Quod restat pro salubri adeo consilio, gratias tibi immortalæles agit tuus Hieronym. si quādo dabitur facultas egregie quoq; relaturus. LV. Nihil addubito, Tu, quod tibi felix ac faustum sit, ad bonarum artium mercaturā proficiscere. Vale.

FINIS.

# DIALOGI

PVERILES CHRISTOPHORI

Hegendorphini XII. lepidiæque ac  
docti.

DOCTISSIMO VIRO SIMONI

Pehm Gymnasiarchæ in monte Dia

uæ Annæ, Christophorus He

gendorffinus. S. D.

**C**ircunferuntur passim, uir doctiss. Dialogi uiro-  
rum doctissimorum, pueriles loquendi formas re-  
presentantes. Id quod uix dici potest quā pueris usui fu-  
turū sit. Errant illi & uehementer errant, qui non his  
loquendi formulis appositis, puerorum linguā, expoli-  
torem reddere laborant. Erasmus ille magnus alicubi  
hoc ipsum cū pueris faciundum esse admonet, eius cal-  
culum, nemo non candide probat. Quapropter & ego  
illorum uirorum stimulis excitatus, Dialogos quosdā  
ludere cœpi. In quibus si non omnia uirorum superiorū  
uestigia imitabor, ignoscere debes. Mihi non tam propi-  
tius Mercurius est. Mihi non tam dulces camœnæ, quic-  
quid possum, reddo, non gloriolæ choragiū ambio, con-  
tentus, si quantulacumq; utilitas ad bonæ mentis adole-  
scentes emanarit. Tibi autem uiro doctif. dedicare hos  
dialogos uisum est, q̄ soleas rebus ipsis impensius faue-  
re, ex quibus puerorum lingua utcumq; expoliri pōt.  
Et non paucis annis huc omnes conatus destinasti, pue-  
rorū ut balbutiei succurreres. Et ego mutuam tibi ope-  
ram præstare non erubesco. Tua humanitate fretus,  
qua neminem nō in & laboris & honoris collegium as-  
seiscis. Accipe igitur quicquid est xenioli, grauiora,  
Deo auspicante, dabimus, si has nugas nō omnino displi-  
cuisse uidero. Vale.



DIALOGI.

# GEORGIVS

ET CHRISTOPHORVS DE VERIS

temperie colloquuntur.

GE.

**S**aluus sis mi Christophore. CHR. Et tu salue. GE.

Quid rerum agitur hoc iam ueris tempore? CHR.

Nihil e quidem rerum, nisi q, plurimum gaudeo asperū  
hyemis tempus defluxisse, atq; iam amenissimam ueris

temperiem appetere. GE. Ecquid refert quo tempore

uiuas, modo in literis uiuas? CHR. Tu Pol homo nō es

sobrius, hyeme, quæ mala exhauriamus, tuo ipsius, ut o

pinor periculo expertus es. Nempe q, male uestitus, &

sæuiente iam bruma, ciuium domos quæritandī uictus

gratia oberrare cogeris, & aliquando ita frigore ma

nus obrigescent, ut ægre ollam in manibus gestare que

as. GE. Belle narras, ac uerum tetigisti, sed ego hoc ipsū

infortunium, Deo laus, nondum expertus sum, ut qui

à parentibus semper tot commeatus capiam, quo hye

mis sæuitiam propulsare possim, quamuis nō ita exhau

stus sum, ut neq; quid edam, neq; quid bibam, restet.

CHR. Non est q, te hoc tēpore maceres, in patriā cōce

de & cōmeatu, in futurum æstiuum tempus, te instrue.

GE. Memorē mones, & ut Home. ait, & ut dicitur

MOSELLANI.

VEG. Ego ipse iā cōmissionē à præceptorepetiturus quo  
 in patriā me conferā. CH. Et mihi animus esset, patriā  
 inuisere, si sperarē me quippiā à patre corradere posse,  
 Sed è pumice citius, sat scio, aquā extorseris q̄ unum à  
 patre numulum. Tam philargyrus est. Tam semper ue-  
 retur nē ad incitatē redigatur. GE. et quæ malū demen-  
 tia est, patrē uelle literis te addicas, & non mutua pecu-  
 nia studia tua, alere & fulcire. Pecunia opus est, alioq̄  
 nihil omnino in literis agas, necessum est. Vnde nō ime-  
 rito Comicus quidā Plutū diuitiarū Deū loquentē fa-  
 cit δῖα μὲ πᾶντ' ἄ γένονται. i. per me oīa fiunt. CHR.  
 Quid agis? ego, quantū in me situm est, reddo, proborū  
 hominum opera suffultus. Nā hactenus, laus superis, nū-  
 quā pecunia defuit, ad cōparanda dictata scholastica.  
 GE. Sed hac de re posthac, ne in lente unguentum, quod  
 dicitur. Nunc quod nostri est instituti, effectū curabi-  
 mus. Accedamus præceptorē. CH. Sat scio non permit-  
 tet nos patriā inuisere, uix enī quadragesimæ carceres  
 ingressi sumus. GE. Tu Pol tuam ipsius umbrā reformi-  
 das, mihi negotiū curandū da. CHR. Deus feliciter uer-  
 tat. PAN. Ad malos coruos, quis ita fores pulsat? En  
 Georgi, En Christophore, quid uestra cupido est? quid  
 aduentus uester præ se fert? GE. Est præceptor intus?  
 PAN. Est. GE. Quid rerū molitur. PAN. A prandio do-  
 mum redijt, ultro citroq̄; commeans. GE. In tēpore ad-  
 uenimus, paucis eū cōpellare uelimus, nisi alijs uacaret  
 PAN.

## DIALOGI.

PAN. hic pedē figite, donec reuertar, periculū faciā qđ rerū agat. PAN. Præceptor humaniſſ. ſunt pro foribus duo adoleſcentes, qui paucis cū tua humanitate agere uolunt. PRAE. Qui ſunt? huc accerſantur. GE. Salue Præceptor humaniſſ. PRE. Et uos ſaluate, qđ eſt quod me uultis? GE. Non ignoras præceptor humaniſſ. iam quadrageſimæ tempus inſtare, in quo non parum propter cōmeatus penuriam, fame maceramur, pecunia ad uiuum uſq; denudati, nec obulus reſtat, quo reſtimemus. Quare uelim tuo fauore patriā repedare nobis liceat, gratias interim agentes, q̄ nos in ſcholaſticorum album aſcripſeris, & optimis quibuſq; artibus nos erudieris, olim gratias relaturi, ſi quandp̄ per fortunā nobis licuerit. Et quod in præſentiarum nobis non datur, Deus. Op. Max. cumulatiſſ. rependet. PRAE. Mirū eſt uos tā cito hīc auolare uelle, octo aut āplius ſeptimanæ ſuperſunt, priuſq; prælectiones ueſtræ ad umbilicū deducātur, & uos iam hinc diſceſſum adornatis, ſi meo cōſilio obtemperare uultis, quod arbitror uos non inſrugiferū experturos, ad unā aut alterā hebdomadam nobiſcū duraretis uelim. Nihil negocij uobis domi eſt. GE. Fames ipſa nos domū abigit. PRAE. Dī boni, ſi alij non fame percunt, nec uos, ut opinor, fame peribitis. Tum ſi nihil aliud hic remorari poſſet, hoc ſaltem remoram uobis iniiciat, q̄ his diebus, peccatorum deteſtandorū rationem uobis tradam, quo in ſenſus nouitate reforma



## HEGENDORPHINI

ti, Christo fructus edatis in patiētia, Trāsitum, Pascha  
 Hebræis sonat. Nēpe quòd ex hominibus iā ex peccato  
 rum tyrānide, ad uitæ libertatem aspirandum est. GE.  
 Tā lubenter hoc discere uelimus, quā nobis usui futu-  
 rum scio, sed parentum affectus hic diutius agere non  
 patiuntur. PRAE. Vt lubet, uos inuitos seruare, non cō-  
 silium est, per me ergo domum proficisci potestis, modo  
 date operam, ne moribus subagrestibus apud parentes  
 geratis, ne suspicentur uos illā morum luē in ludo nos-  
 stro cōtraxisse. GE. Faciemus oīa sedulo, remis tum ue-  
 lis conantes, ne ludo tuo dedecori simus. PRAE. Itē er-  
 go fausto auspicio. GE. Valeat tua humanitas faustiter  
 præceptor humanissime.

HENRICVS, FRIDERICVS De æstate colloquū-  
 tur, Et in quē ludum literarium proficisci uelint. FRI.

**V**T uales Hērice? HEN. Optime ualeo, quo in car-  
 dine res tuæ aguntur? FRI. Omnia leta, omnia  
 auspicata, cum parentibus satis superq; egi, in ludum  
 triuiale me conferam, sub docto aliquo præceptore  
 militaturis. Tu si te mihi comitem addere uis, gratum e-  
 rit, ut quod maxime. HEN. En optato res cadit, diu me  
 cum cogitauī, in ludum aliquem proficisci uelle, nec es-  
 go solus iter facere soleo. Tu ergo mihi comes uel mul-  
 to gratissimus diuina, ut dicitur, uirgula oblatuse.

FRI.

## DIALOGI.

**FRI.** In quem autem ludum te tradere animus est. **HEN.** In quemcumq; tu uolueris. **FRI.** In Lipsensem, audio enim illum omni studiorum genere uel imprimis florere. Tum Gymnasiarcha, illi ludo præfectus est, homo mire facundus, & in nullo non sciètiarum genere Roscius. Adde quòd urbis ipsius celebritas, me illuc adigit. **HEN.** Sed audio pestem illic uehementer grassatam esse. **FRI.** Amici cuiusdam literis compertum habeo, pestem desæuisse, Academia quoq; magistros illuc pedem retulisse. **HEN.** Non fieri potest, ut pestis omnino desæuerit, si scholastici ex omnigenis oppidis, in quibus hætenus pestis populata est, confederint, ex afflatu ipso peste corripiamur, oportet. Præsertim his æstiuis mensibus, quibus nõ raro tam numerosa scholasticorum turba confluit, ut eam uix capiat ludus. **FRI.** Quid cornicarum inepte, facile est inuenire sutelas, quibus tuam inertiam oppallias. Nos non soli illic erimus, cum alijs adolescentibus fortunæ experiamur aleam, siue moriemur, siue uiuemus, Christo moriemur, & Christo uiuemus. **HEN.** Tum, ut audio, non licet æstiuis mēsis frigida lauare, nec ceras decerpendis mutuam agricolis operam collocare, nec aliquot dies scholis abesse, plus quàm Argos illic agere, audiui, qui circumforaneam illam turbam obseruent. Nec desunt Corycei, qui clandestinos sermunculos, quos amicus cum amico nugatur, ad præceptorem deferant. **FRI.** Iam audio quàm nihil

# MOSELLANI

scholasticum in te spiret, scholasticum agere uis, & rusticorum negotijs te immergere cupis, scholasticus ἄνω τὸ σχολῆς dictus est, hoc est ab ocio literario, nempe qui rusticarum rerum labyrinthis exemptus, se totum literis addicit. HEN. Sed quis semper literis operam nauare potest? Omnium rerum facietas est. Vide tu ne studium plus quam adamantinum in neruos abeat. FRI. Tu unius oboli gratia, literas, sat scio, deuoueres. HEN. Quæ Palas tibi hæc in mentem misit? FRI. Audio te cerasis carpendis addictiorem esse, quam, ut literis bonis aliquam se mentem facias. HEN. Non semper patruos sapere oportet, ludendum aliquando par, impar, equitandum in aridine longa. FRI. Adolescentes sumus, Non est quod doctissimorum uirorum collatione nostro otio blandiamur, si eo erepserimus, quod illi ueluti in Olympiade euaserunt, ea feriandi à literis libertate utamur licebit. Iam illud Titi Vespasiani in intimos pectoris recessus insculpas oportet, qui dum aliquando recordaretur, se aliquo die, nihil egregij præstitisse, ὁ μὲν τρεῖς καὶ ἄγαν αὐτῷ ait, ille dies hodie perijt. Id quod Apelles pictor ille nobilissimus, non instrenue imitatus est, qui nullum diem absque lineâ esse oportere dicebat. HEN. Sed iam non ignoras, quam solis æstus ingrauescat, & quam capita Anticyris digna faciat. FRI. Non est quod solis æstus te prægrauet, si inter diu prælectionibus audiendis, tempus impertias, disluculo uero è lecto surgens à capite ad calcem usque respetas, optima quæque in memoriæ thesaurum deponas,



## DIALOGI.

hoc agas oportet, si non uis ex paleis tuorum laborum inanes culmos excutere. HEN. Iam in uiam reduxisti, iam reddidisti animū, quoquo tu perfectus eris, ego te comitabor.

IOANNES, SEBALDVS.

De autumnii tempore confabulantur.

**E**C quid agis Sebalde? IO. Ecquid agerem, iam sus-  
pellectilis meæ sarcinam colligo, domum aduola-  
turus. SE. Hui tam cito? IO. Cito? Bartholomei feriæ es-  
lapsæ sunt, Mariæ natalis in foribus est. Vix domum re-  
diero, & Michaëlis feriæ, me anteuertent. SE. Ecquid  
te domum abigit? IO. Vindemia iam faciunda est, et me  
musto, in lacunis subscatente, ad plenum usq; explebo.  
SE. Homo es Bacelus, qui musti gratia studiorum iactu-  
ram facere uis. IO. Prælectionibus omnibus iam quasi  
Colophonem imponent. SE. Si expectare uis paulisper  
donec literas patri perferendas, conscribam, te rursus  
uisam. IO. Seculum effluet, quā hic me auellero. SE. Nō  
uelim ieiunus iter ingrediari. Nā medicorū præscrip-  
to constat, Autumnum magnum malorū agmen homini-  
bus adferre. IO. Sæpe demirari solitus sum, cur in Aus-  
tumno homines in tot malorum genera cadant. SE. Me-  
dicorum calculus est, propterea in autumnu uarijs uici-  
is hominum corpora affici, quod prima luce, nescio  
quod frigus panicum homines inuadat. Meridie autem  
calor quidam repentinus oboriatur. Vnde ex illa tem-

## HEGENDORPHINI

poris uarietate corporum crasis perturbatur. IO. Iam audio in medicorum diatribis enutritus es, ut qui tã archana medicæ rei mysteria, ueluti ex tripode pronuncias. SE. Tum autumnno quid Lipsiæ fiat, scis? IO. Qui ego scirem? Tu qui olim illic uersatus es, apertis ut dicis tur, tibijs ediffere. SE. agricolæ idies plenos, pomorum pyrorum, mespilorum, calathos in forum asportant, ubi aliquando ego græca fide mercari soleo. IO. Quibus autem strophis eludis, ne ab agricolis arripiaris? SE. Gygis annulo utor, uel alium mihi adiungo, qui poma et pyra licitatur, et cum agricolæ in gremium mihi numerarunt, ego me, in pedes, quantum possum, proripio punica fide exoluens. IO. Solent autem ne te insequi? SE. Quĩ insequi me alio circũstante possunt? Verentur ne dum Iunonem insequantur, in nubem incidãt, hoc est, ne dum paruo cuidam damno mederi uolunt, in grauius prolabantur. IO. Quid si ad magistrum deferente, quot quæso plagas tibi lucrifaceres. SE. Quid? ueluti Elephantina cutis iacula eijscit, sic & mea cutis ad quæuis flagra occalluit. IO. Iam cretisare uideris. SE. *ῥῆξις καὶ ὄψις*, ut quidam dixit, hoc est, paupertas Artes excitat, & fames ipsa Chameleonta agere docet. IO. Audiui quondã à meo præceptore, apud græcos morem fuisse, quod famem uirgis ex ædibus eijscerent, dicentes foras famem, intro diuitias & sanitatẽ. SE. Vtinam & ille mos apud nos duraret, sed plus iam æquo

## DIALOGI.

æquo detineo te. IO. Minime gentium, si quid aliud uis,  
dicito, omnia sedulo exequar. SE. Parētibz narra me  
in literis gnauiter uiuere. Alioqui si rescirent me ali-  
quando ineptire, ne numulo quidem auxiliares manus  
porrigerent. Sacerdotium satis amplum mihi impetra-  
runt, si eo eruditionis progredi possem, quo sacrificio  
celebrando sufficerem, in cælo essem. IO. Belle narras,  
sed q̄ quæso sacrificio celebrādo par esse potes, si uers-  
ba nec quidem intellecta, Deo obmurmuras? SE. Nō so-  
lus ego in eo ludo sum. Multi in easdem ansas iciderunt  
IO. Sed errantium multitudo, non facit errori patrocini-  
um. SE. Ego non manum uerterim, modo numos mihi  
uenari possim. IO. In Remboth, ut audio, hominum ge-  
nus degenerare uis, quod pietatem ipsam ne pili quidem  
faciebat, in cute curanda plus æquo operans. SE. Sed e-  
go te itineri accinctum, distringo, uale igitur, & faus-  
to omine patriam adeas, letiore ad nos recurras. IO.  
Et tu interim uale, siq̄; fortuna tibi benignius arrises-  
rit, fac mei memoria non pectore effluat tuo. SE. Hac  
ego te cura leuo, nam qui possem tam dulcis congerro-  
nis non meminisse? IO. Vale igitur.

BARTHOLOMEVS ET

Petrus.

De tempore æstiuali colloquuntur.



## MOSELLANI

Q. Vidita eiulas ò Bartholomee? BAR. Cur non eiularem uel sanguine, ut dicitur flerem, scribe domi est qui subinde me uirgis cedere, egregius flagrio, solet, nisi ad facietatem usq; cibos illi subministrauerim. PE. Ego non huius, illud de sale emptum mancipium facere, si cibum ad usq; clamando emendicatum, illi ipsi suppeditare deberem. BAR. Nihil grauarer, si aestiuum tempus nobis incumberet, sed his hybernis mensibus, mirum est quanto negotio cibus emendicandus est. Nō raro ad octauæ horæ signum ad ciuium ædes aspidere cogor, ut carunculæ portionem prærandam extorqueam. PE. Solent ciues alioqui pueros subornare qui quotidie certis cantilenis pro foribus cantillant, inde pecuniarum messem, uel multo uberrimam demetentes. BAR. Conscutores quos uocant, quicquid est pecuniarum, uel uti bolum è faucibus præripiunt, Ego nō xxv rog in morem eadem catilena ciuium aures enecare soleo, unde raro triuncium lucrifacio. PE. Cur & non tu Musicam artē addiscis? BAR. Non ex omni ligno fit Mercurius, nō omnes, omnibus artibus appositum sumus. PE. Non tam Apollo pollinis oraculum, quā hoc uerbum, uerum est, sed tamen solent ciues, quosdam adolescentes uulgaribus catilenis subornare. BAR. Quid hoc est? Ex una septimana uix semissem reliquam facio. PE. Sed tamen ad eum modum increfcet cumulus Hesiodius. BAR. Sed scribe nescio quas nugas agit. Me secordiores esse ait, quā  
ut

## DIALOGI.

ut numulum domū adferā. PE. Si tā suis, ut fertur, moribus homo est, cur non illum missum facis? BAR. Tum si cibaria domum attulero, non igniculus suppetit, quo recalefaciam. PE. Quanto precio agere in scholis haberno tēpore datur? BAR. Sex argenteis numis. Nam Cantori ipsi in ipsis diuæ Catharinæ ferijs, argenteum nummum suppeditamus, & singulis tribus hebdomadis nummū antiquū damus, & nescio quæ alia à nobis exiguntur. Tum annua uestigalia pro diuersorijs depensare cogimur. PE. Prò hominum fidē, mihi nulla pecunia tam inique postulari uidetur, quā quæ pro diuersorijs exigitur. Male illi sit, qui hunc censum primus instituit, nudo uestimenta detrahare uoluit. BAR. Emori citius uideas, quā ut uel obulum in ea pecunia remittant. Tam è flamma, sat scio, pecuniam peterēt. PE. Et uobis olim, lignis uendendis, pecunia impendenda erat, sed ciues pleriq; nos hac pecunia leuarūt. Vnde quotidie caniticum quod Salue uocāt, in templo detonare cogimur. BAR. Sed frigore nullo tangimini, calidum enim semper uaporarium est, in quo frigora discutere potestis, & crede mihi in longe meliore uiuis sorte, quā ego. PE. Verissimum est quod Horatius dixit, Optat ephippia bos piger, optat arare caballus, Hoc est, nemo sua contentus sorte est, semper aliorum sortem magis admiramur. BAR. Nescis profecto, nescis, quantis negotiorum labyrinthis immergar. Hospes meus subinde pro-

## DIALOGI.

canium peragere solet, & ad intempestam usq; noctē  
 somnum protraho. nec uesper ullius libri inspiciūdi co-  
 pia datur. Ceruisia semper afferēda est. PE. Et mihi ad  
 octauæ horæ signum uicatim *ἔως ἡμέρας* cursitādum  
 est, ut uel iusculum mihi parem. Tu autem opiparis quo-  
 tidie cibis, uentericulum exatias. BAR. Mallem ego tes-  
 nuius uictitare, quā cibi gratia studiorum iacturam fa-  
 cere. PE. Qualem ego fortunam nactus sim, ignoro, ni-  
 si ego me olim ex illis fortunæ tumultibus extricaturū  
 sperarem, malis illis ceu tempestate afflictus, concide-  
 rē. BAR. Has nugas missas faciemus. Sed scis quid cra-  
 stino die laboris in humeros nostros resideat? PE. qd-  
 nam, nobis prima luce è lecto surgendū est, ad diuæ uir-  
 ginis sacrificium canendum. Tum cantilenæ, in Christi  
 natali canendæ non parum temporis exigunt, et nescio  
 quæ alia laborū ilias exhaurienda est. BAR. Dabit his  
 Deus quoq; finem, quippiam iam pietati dandum est, ut  
 ut enim in sacris sementem feceris, ita & metes. Christi  
 iam aduentus à nobis, obuijs, ut fertur, manibus expe-  
 ctatur, omnibus nobis claborandum est, quo sese in nos-  
 tram mentem per gratiæ suæ charismata diffundat. Et  
 nobis gratiam ad mensuram det, quemadmodum olim à  
 concionatore non indocto accepi. BAR. Belle narras.  
 Quare quicquid est frigoris, quicquid est tædij liben-  
 ter decoquemus. PE. Ego quidem nullum reformida-  
 bo laborem. BAR. Quare mutuo in acie certabimus.

DE



## HEGNDORPHINI

### DE EPIPHANIAS FERIIS

Thomas & Sebastianus confabulantur. SE.

**D**Eus auspicatum tibi conferat annum. THO. Et tibi det omnia alba contingant. SE. Quid uero mihi pro Xenio uel strenula mittes? THO. Qui tibi mittam, cū nec obulus ad emendos panes suppetat, quo latrantem stomachum exatiam. SE. ego uel Calabri hōspitis munera, boni consulam. THO. ego arbitror patrē breui aduolaturum, q̄ si aduenerit, omnia in portu erunt, & ne asymbolus apud te sim, curabo. THO. Non soleo lubenter spem precio emere. SE. Si expectare nō uis, praeuētere hebrum potes. THO. Vnde quæso mihi tandorum munerum ratio apud Christianos radices egi- git. SE. Tute lepus es, & pulpamentum quæris? THO. ego, quantum ab alijs habeo, referam, arbitror primū illis Xeniolis homines sese mutua salute impartire, & ueluti aggratulari, quod Dei benignitate incolumes, totius anni spacia emensi sint. Vel quod propius uero est, quia illis ferijs tres Magi mysticis quibusdā muneribus, Christum regem demeriti sunt. Sic Christiani in Christianæ charitatis symbolum, Apophoretis mutuo amicitiam iungunt. SE. Non à ueritate abhorrent, quæ edisseris. sed Circumcisionis feriæ, cur quæso ab ecclesia institutæ sunt? THO. Nō in Theologorū harena nō unquā exercitus sum, sed tamē quæ ab alijs audiui recē sebo, Circūcisionis feriæ propterea peragūtur, ut quæ

## HEGEN DOR.

admodū Christus in præputij carne amputatus est, si  
 & nos ab affectibus amputemur, ex eas ipsarum uolū-  
 ptatum carnes excindentes, ne animæ lepram adferāt.  
 Ita enim quidam dicebat. Hiero. illum sacrum in lib. d.  
 uera circuncisione, disputare. SE. Quando quidem, in  
 Theologorum campo iam congressus es, Epiphania unde  
 nomē promeruit? THO. Quanquā hæc à nostra pro-  
 fessione parerga sunt, & quasi extra oleas, ut dicitur  
 tamen quæ à præceptore olim prælegente, excepi. In  
 num tuum effundam, ἐπιφάνια dicta ἀπὸ τοῦ ἐπιφ-  
 νέω, hoc est appareo, nempe quod tunc Christus Magi  
 ipsis, nostra idutus carne, apparuerit. Nec uero Mago  
 accipies, maleficos quosdā fuisse, ut Augustinus uult  
 sed sapientiæ studijs deditos, & syderum cursus peri-  
 tos ex felicissima Arabia prodijisse, in qua ex auro &  
 argento uasa, lectos, Tripodes, facere consueuerant  
 qua de re præceptor noster Picum Franciscū in li. pra-  
 notionum adducebat. Iam babes uno, ut dicitur, uerbo  
 quod à me petijsti. SE. Et iam ad uesperarum precū sa-  
 crificium eundū est, si nō plagas lucrifacere uolumus.

## DE FESTIS BACCHANALIBVS

Philippus & Melchior collo-  
 quuntur. MEL.

**F**esta iam Dionisij appetūt, quo mihi nil gratius ob-  
 tingere posset. PHI. Quid tū? MEL. Quoniam ad  
 sati

## DIALOGI.

satietatem usq; me omni ciborū genere explebo. PHI.  
 Sed posthac in quadragesimæ tēpore fortiter esuritus  
 rus. MEL. Vt ut res cadat, satis beatus uideor, si semel  
 atq; iterū uentriculū distendero. PHI. Quo autē te pro  
 fers? MEL. recta ad forum eo, ollas empturus. In quas  
 uictum capiā. PHI. Emere soles ollas punica, ut opinor  
 fide. MEL. Non nisi arte Pelasga, figulos deludere pos  
 sum, nō cesso Planum agere. PHI. Quid si arripereris.  
 MEL. Pedes mihi remedio sunt. PHI. Præceptor remis  
 sionem à studijs, ut audio, ad tres dies dedit. MEL. Si  
 tres addidero nihil, ut spero, damni adferet. PHI. Ego  
 certe octo dies mihi ad hæc festa sumam, necessum est,  
 si modo tempori, ut dicitur, seruiendum est. MEL. Næ  
 tu mecum uehementur sentis, sed tamen ita Baccho in  
 dulgebimus ne à musarū aris recedere uideamur. PHI.  
 Sed heust tu, cur nam Baccho has ferias consecrarunt.  
 MEL. Nempe q; his diebus nemo non Anticyra egeat,  
 nemo non insania corripiatur. PHI. Et Baccho cornua  
 cur affingunt? MEL. Quippe quòd olim poculorum ui  
 ce cornua fuerint. PHI. Iam satis teneo. Tu uale.

NICOLAUS ET IOANNES De rerum

salutatione colloquuntur. IO.

**E**Cquid portas mi Nicolae. NI. Cantharum ceruis  
 siæ Neupergensis, domino meo ex ciuiū, ut uocāt,  
 cellario, affero. IO. Mi Nicolae, perquā uelim formu  
 lam quandam ceruisiæ consecrandæ præscriberes. He



## HEGENDORPHINI

rus meus indies negotiū mihi facessit, & rustice ceruisia  
 consecrem. Nec ipse me melius edocere pōt. NI. Nō cre  
 dis mihi, q̄ ægre liceat latinum sermonem, ad uernaculū  
 illum accommodare, sed tamē quantū ex meo præ  
 ceptore audiui, in sinum tuum effundam. Cum ergo Cer  
 uisiam consecrare uis, dicere potes. Ceruisia uobis salu  
 ti sit. Ceruisia uobis commodo sit. Ceruisiam Deus sua  
 bonitate consecret, ne quid noxiij uobis ingērat. IO.  
 Iam rem teneo, qua autem ratione ab aliquo salutatus,  
 respondere soles? NI. Si salutor, salue mi amice, respon  
 dere soleo, & tu identidem salue. Cum salutor, saluus  
 sis, respondeo & tu saluus sis. IO. Bene se res habet, oīa  
 teneo, sed cum mane aliquem accedis, qua salutatione e  
 um dignari soles. NI. Dicere soleo. Bonum mane, Bona  
 dies, cum in meridie aliquem adeo, dicere solitus sum,  
 plurimū salue, uel saluete, salua sit tua humanitas præ  
 ceptor mi amantissime. Cum uero ab eo, dicere in more  
 habeo. Viue & uale, uel uiuat & ualeat faustiter, tua  
 uel uestra, humanitas. IO. Sed quo quæso modo efferre  
 uelis, bibite bonum Ioannis. NI. Haud scio an oratio la  
 tina, ad id genus locutiones uernaculas aspirare possit,  
 dicere tamen uellem, bibite postremo nobiscum, bibite  
 nobiscum nomine Ioannis, nam ne ullus quidem fons in  
 itinere occursat. IO. Bene se res habet, gratias tibi ha  
 beo, aliquando curabo ne a symbolus apud te sim. Sed  
 heus tu, unus est scrupulus, qui me non raro male habet.

Cum

## DIALOGI.

Cum somnum capere uis, qua quaeso salutatione abire  
solcs. NI. Dicere solco, ego somnū capefcere uolo, uos  
quoq; quando lubitum est, quieti uos tradite. Vel alio  
rationis habitu efferre potes. Deus uobis omnibus no-  
ctem tranquillam impertiat, uel quiescite feliciter, qui  
etern capite suauiter. IO. Omnia in portu sunt iam, uale  
feliciter. NI. Et tu uale.

### BARTHOLOMEVS ET MATTHAEVS De uarijs rebus colloquuntur. BAR.

**P**rosint tibi balneæ mi Bartholomce. BAR. Et tibi  
omnia prosint. MAT. Balneæ ut tibi arrident?  
BAR. Si mihi adeo arrisissent, diutius inibi morā nex-  
uissem. MAT. Scis quid rerum nouarum Africa apud  
me produxerit? BAR. Modo omnia dextra sint, noua  
non illubenter audio. MAT. Et ludus literarius tibi  
scopis uerrendus est. BAR. Dij boni, an ne hoc nouum?  
hoc negotij mihi datum esse non clam me fuit. MAT.  
Scopas ubi compares nostin? BAR. Apud famulum  
furnarium. MAT. Aliud autem audire uis? BAR.  
Si tam bullatas nugas expromere uis, taccas malim.  
Miror qui tam Hyberijs nugis nos onerare possis.  
BAR. Putabam me uelle tibi timorem incutere, si re  
paulo atrotius adornarem. MATTH. Quid rerum  
est, ediffere πένυσαι λεπτολόγησθαι, ut græcæ dicam.

## HEGENDORPHINI

**MAT.** Cubiculum nostrum quoq; tibi scopis expurgandū est, sordes ad carnificinam exportes, necessum est, tenui potu medicando occuperis oportet. Et nescio quæ alia laborū ilias tibi hodie exhausta est. **BAR.** Ecquid malū infelicitas est. Miror hodie tantū laborū sarcinā in humeros residere, per integram hebdomadā uel Epicureo Deo, ociosior fui, et hodie nihil non laborum mihi obeundum est. **MAT.** εὐφραμίη καὶ τύχη πᾶσι θεοῖς, hoc est, bona uerba quaeso, et fortunam praesentem boni consule. **BAR.** Ecquid incommodi tibi accrescere posset, si me mutua opera iuuares, et meam operam in rebus tuis sedulo experturus. **MAT.** Quid nimirum tecum uellē, tantum abest, ut non in hac re auxiliares porrigam manus. **BAR.** Sed hinc abeundi tēpus. Tā tū non uide post festū, ut dicitur, appropereamus. **MAT.** Quid? uix secundæ horæ signū tactum est. **BAR.** Si adhuc tam maturo est domū abibo, ius quod heri uesperireliqui feci, uentriculo donabo. Tandem tua opera adiutus, dicto citius quicquid est laboris expediā. **MAT.** Tu modo iam ne diu moras nece.

**MARCUS, PETRVS De eleemosinis colloquuntur. MAR.**

**V**T uales Petre? **PE.** Maceratam uiuo uitam, sed tamen incolumem et inconcussam. **MAR.** Quot eleemosynas hodie emendicatus es? **PE.** Vix unā aut alteram.



## DIALOGI.

terā. Nā nescio quo pacto ciues oēs fame contabescere uolunt. MAR. Nō calles, audio, qua uia eleemosynarum uindemiā facere possis. Non oportet statim à foribus pedem moueas, si importunius tibi obgannierint, urgendi sunt, & si crebro iacias, Venerē iacies, ut in pro uerbio est. PE. Quid? non raro me lapidibus minantur, nisi è lumine discessero. MAR. Iocantur tecū, ego perstarē, uisurus quorsum res abiret. PE. Ego posthac me tibi comitem in emendicando pane adiungā, alioqui ante diē, sat scio, fame mortē oppetā, necessum est. MAR. Quid ni? Ego omnibus machinis, tuæ paupertatule obuiam ire uolo. Num uides quo pacto solē mulieres illas cadauerosas à foribus arcere, & solus prædæ inhiare. PE. Bene se res habet, Non ullus me à latere tuo arcebit. Iam autem uale.

### IOSEPHVS ET GEORGIVS Deratio ne studendi colloquuntur. IO.

**S**alue plurimum mi Georgi. GE. Et tu salue, quo te prosperas? IO. A præceptore domū eo. GE. Sub quo tu præceptore stipendia literarum facis? IO. Sub hoīe non uulgariter docto. GE. Qua nam ipse in te erudiēdo uia utitur. IO. Sub tempus antelucanū & græca & latina declinatione exercet. Et logicis quoq; ἀποδείξεις & me instruit, quomodo argumentorum panopliam cōparare possim. Nugas quasdam tenues ad Macariā, ut

## HEGEN D.

dicitur, mittit. Nam, plerosq; refert eam tradere logi-  
 cam quam priusquã addiscamus obliuio quædam obre-  
 pat, quemadmodum de Strepsiade Comicus quidã scri-  
 psit. IO. O te felicem cui talis obtigit præceptor. GE.  
 Tum tempore pomeridiano Grammaticã Philippi Me-  
 lanchtonis iuuenis, ut ego audio, in utraq; lingua ex  
 quo suspiciendi, prælegit, subinde electas authorũ græ-  
 corum sententiolas, & Chrias quasdam ueluti Coroni-  
 des adiungens, quibus uelut melle prælito præceptio-  
 num absynthium edulcat. IO. Ni plane lapis sis, doctus  
 uadas oportet. GE. Tum quò cum literis literatis Chri-  
 stum ipsum imbibamus Erasmi Roterodami Enchiridiõ  
 prælegit, ex quo ueram pietatem cum eloquentia con-  
 discere possumus. IO. Et quis nõ sub tali præceptore sa-  
 peret? GE. Tum subinde me thematis exercere solet,  
 Thema quoddam exponens, & tractandi ductum præ-  
 scribens, non raro declinationibus me exercet, breui-  
 ter mihi explicans, quæ in proœmio conciliandi ratio,  
 quæ narrandi lux, quanta in diuidendo prudentia habẽ-  
 da sit, quàm subtilis et crebra argumentatio, quibus ui-  
 ribus inspiret, & ut summatim dicam, quicquid ad ora-  
 tionis artificium requiri solet. IO. En ista tua oratione  
 in alienum, ut dicitur, mundum tralatus uideor. Tã no-  
 ua instituendi ratio mihi occurrit. Chameleonta, ut au-  
 dio, agit præceptor tuus. GE. πλοσμόν πᾶν ὡς ut Co-  
 micus quidam dixit. Quapropter uarijs rebus animũ

## DIALOGI.

exercere solet, ne eadem per eadem audiendo, retundetur. Quis enim præceptorem non nisi cupressum si mulantē? IO. Quibus ergo alijs rebus uacare cogeris, GE. Subinde & Græcæ & Romanæ epistolæ mihi conscribendæ sunt. Indies aliquid in memoriam reponendū ne memoriæ thesaurus negligatur. IO. Hoc ipso ut dicitur temporis puncto à meo præceptore desciscam, atq; in tuam scholam, ceu literarum militiam nomen dabo. GE. Sat scio, intra unius anni spacium, plus promouebere, quàm si alioqui in alijs  $\phi\gamma\omicron\upsilon\tau\iota\sigma\tau\eta\pi\iota\omicron\iota\varsigma$  ad sex aut amplius annos computrescas, pleriq; enim præceptores multo indoctiores discipulos reddere solent quàm acceperunt. IO. Tuo consilio nihil mihi prius erit, post hac ego maiore beneuolentia te mihi obstringam, quàm haftenus deuinxī. Non putaui enim te adolescentem esse tam raro ingenio. GE. Quo sim ingenio, nescio, hoc certe de me polliceri ausim, me non obscure uidere posse, quid distent æra lupinis, Et quàm Corydus in aliarū auium numero rustice obstrepat. Tu modo ne animum ad desperationem conuerte. Commodius poteris initio mederi, quàm fini. Aetas iuuenilis in quemcumq; habitum sequax est. Aetas uero decrepita, mirum est, quàm intractabilis sit, quàm saliuam illam primam, quam olim imbibit, semper reddat. Vnde Paremiacus est sermo, Senis mutare linguam difficile est, & quia



## HEGEND.

senex est Psitacus, ferulam negligit. IO. Tu Pol puer es præcoci sapientia. Catonem aliquem iam me audire putavi, non Adonidem quendam puerum. GE. πᾶύσαι λήρω, ut græce tecū loquar, quod animo tuo descuisti, non in hyperbetea, usq; profer. IO. Iam eo, tu interrim uale.

## GASPAR ET BALTHASAR.

De repetundis lectionibus confabulantur.

BAL.

E Cquid agis Gaspar. GAS. Qua uia lectionibus iam repetendis, uteris. BAL. Primo solitus sum uulgarem accommodare rationem, tum ad Grammatices coticulam omnia exigere, inuentionis acumen expendere, omnium uocularum situm subducta ratione ad calculum uocare. Tandē si quod noue uel prisce dictū occurrerit, in nidos ad id paratos conuehere, si quæ παροιμία, si quæ sententia insignis, stellis, ut dicitur, notare soleo. Et ea quæ insigniora uidentur, in memoriæ thesaurum deponere, subinde à lectione surgens, et animo meo utcunq; uoluens, quæ legi. Nec deest Enchiridion, in quod quicquid est illarum opum, ceu promptuarium, repono. Et ea uia utendum est, τὸ εἰς ἄφρονον σπένδοντι, id est, properanti his ditescere opibus. GA. Næ ego homo sum, uel Morycho stultior, qui talium rerum omnem curam abieci. Alia super alia legens. Nec a  
ni

## DIALOGI.

nimum aduerti, quàm omnem operam luderem. Sed uerissimū illud in me ipso experior, qui semper domi ueluti in umbra sese continet, nec in hominum frequentiam progreditur, puerum animale agere. Non raro demiratus sum, me ne pilo quidem doctiorem euadere, nullū omnino progressum in me experiri. Et iam ueluti Epimetheus ille post factum prudentiam solidiorem sumo. BAL. Nihil omnino posthabitu est. Tanto grauius in literas bonas incumbere, quanto serius eas uere ad amorem cepisti, imitare uiatores ipsos qui dum mane in diem usque somnum protraxerūt, quā possunt celerrime, iter carpunt, tarditatem celeritate resartientes, & plerumque citius eō, quod uolunt, pertingunt, quā illi, qui prima luce iter ingressi sunt. GAS. Non ignoro nullam ad discendum seram ætatem esse, Sed tamen istud tuum studium, ego in lucro ponerem. BAL. Serere ne dubita, nō paruus in literis prouentus tibi proueniet. GAS. Faciā ut iubes. Nihil non acturus, quo te aut æquem, aut superem.

## VENCESLAVS ET HERMANNVS.

De coëmendis libris colloquuntur.

VVEN.

Q. Vos tu putas, libros mihi parem? HER. Cicero & Terentij Comœdias coëmeres, ex

## HEGEND.

illis enim solidam eloquentiam haurire posses. VVEN. Qui hoc fit? Ego non satis intelligo. HEN. Paucis, aduerte, docebo. Ciceronis oratio & elegans et pura est. Terētius purus, tersus, quotidiano nostro sermoni proximus, & haud scio an citra balbutiem, quicquid in linguam uenerit, garrire possis, nisi Terentij comœdias in manibus triueris. Nec uero me opte Marte hæc dico. Præceptoris mei iudicium est, quod ego hætenus non infrugiferum expertus sum. VVEN. Et iam Bibliopoz lam accedam, illos libros coëmpiturus. HEN. Exemplaria Terentij uaria sunt, Melchior Lottherus, Calcos graphus in Lipsia, primi nominis, Terentium typis excusit unà cum præfatione Philippi Melanchthonis, iuuenis præter ætatem eruditi. Et Frobenius Chalcographus in optimis quibusq; libris imprimēdis, omnium diligētiss. in paruas paginas Terentium congesit. Tu ea me exemplar, quodcunq; collibitum est. Ciceronis aut exemplaria apud Valentinum Schumannum siue græce appellare mauis Hypodymandrum Chalcographū in Lipsia operæ infatigabilis, reperies. VVEN. Sat habeo, tu uale.

FINIS.



IMPENSIS PAVLI GOETZ, CIVIS  
honestiſſ. ARGENTORATI excudebat  
Christianus Aegenolphus.  
ANNO M.D.XXIX.

